



Early European Books, Copyright © 2011 ProQuest LLC.
Images reproduced by courtesy of The Wellcome Trust, London.
887/D





Early European Books, Copyright © 2011 ProQuest LLC.
Images reproduced by courtesy of The Wellcome Trust, London.
889/D




Early European Books, Copyright © 2011 ProQuest LLC.
Images reproduced by courtesy of The Wellcome Trust, London.
889/D





Early European Books, Copyright © 2011 ProQuest LLC.
Images reproduced by courtesy of the Wellcome Trust, London.
897/D

Re

889







SYLVA
ANACHORETICA

ÆGYPTI

ET

PALÆSTINÆ.

Figuris æneis

ET

BREVIBVS VITARVM

ELOGIIS EXPRESSA.

ABRAHAMO BLOMMAERT

Inuentore.

BOETIO A BOLSVERT

Sculptore.

ANTVERPIÆ,

Ex Typographiâ Henrici Aertssij,

Sumptibus Auctoris.

CIC. 13C. XIX. 60 25

1619

Hieronymus epist. i. ad Heliodorum
de laude Eremiti.

O DESERTVM
FLORIBVS CHRISTI VERNANS!

O SOLITVDO

IN QVA

ILLI NASCVNTVR LAPIDES

DE QVIBVS IN APOCALYPSI

CIVITAS MAGNI REGIS

EXTRVITVR!

O EREMVVS

FAMILIARIVS DEO

GAVDENS!




SIMILIS FACTVS SVM PEL-
LICANO SOLITVDINIS. *Psal. lvi.*

Bolsuerti

fecit.

ad d. f.



ADMODVM REVERENDO
DOMINO
ANTONIO
DE WINGHE
LÆTIENSI
ORDINIS
S. BENEDICTI
ABBATI.

ADMODVM R.^{DB} DOMINE,



Ene cessit Eremitis
meis metatoria sua.
Recordantur etiam-
num quàm læto vul-
tu, quàm liberali ma-
nu eorum exceperis
exuuias, quàm hilari animo eorum di-
cta factaque notaris. Veniunt nunc
ipsi, & suâ se specie repræsentant; quin
& curtam supellectilem suam secum
a 3 defe-

deferunt, caucum, pſiathium, ciliciũ.
Formidolofis quidem antris hærent,
ſed inde celeriũs cæli atria penetrant:
ſeminudi aëris iniurias excipiunt, ſed
ſat tecti ſunt, qui ſub Chriſti vmbra
latitant: terræ velut inſepulti hor-
rent, deprecatorias tamen ad cælum
lacrymas mittunt. Veniunt igitur ad
Te, humani generis legati. Non quæ-
renda illis loca lautia; ſuis ipſi antris,
ſuis tuguriis, ſuis lautumiis ſunt con-
tenti. Ne labora de ferculis; inemptis
dapibus famem ſedant, dactylis, ole-
ribus, lapſanis. Seu ruri ſeu in vrbe
ſunt, OMNIA ſecum portant.

Effigies habes ab amica manu; quæ
vt gratiores eſſent, placuit amico bre-
uia è Vitis Patrum concinnare elo-
giâ. Quæ Auctorum ferè verbis dedit,
ne fucum faceret. Vale.

T. T.


IR. S. I.

HIERONYMVS

EPIST. I.

A D

HELIODORVM.

 **V**ID agis frater in saeculo, qui maior es mundo? quamdiu te tectorum umbra premunt? quamdiu fumosarum urbium carcer includit? Crede mihi, nescio quid plus lucis adspicio. Libet sarcinâ corporis abiectâ ad purum ætheris euolare fulgorem. Paupertatem times? sed beatos CHRISTVS pauperes appellat. Labore terreris? at nemo athleta sine sudore coronatur. De cibo cogitas? sed fides famem non timet. Super nudam metuis humum exesa ieiuniis membra collidere? sed Dominus tecum iacet. Squalidi capitis horret inculta casaries? sed caput tuum CHRISTVS est. Infinita eremi vastitas te terret? sed tu paradisum mente deambula. Quotiescumq; illuc cogitatione conscenderis, toties in eremo non eris. Scabra sine balneis attrahitur cutis? sed qui in CHRISTO semel lotus est, non illi necesse est iterum lauare. Et ut breuiter ad cuncta, audias Apostolum respondentem: Non sunt, inquit, condignæ passion-
Rom. 8. es huius sæculi ad superuenturam gloriam, quæ reuelabitur in nobis. Delicatus es, frater, si & hîc vis gaudere cum saeculo, & postea regnare cum CHRISTO.

S. Basil. lib. de laude Vitæ Solitariæ.

V I T A
SOLITARIA
CÆLESTIS DOCTRINÆ
SCHOLA EST
DIVINARVM ARTIVM
DISCIPLINA.
ILLIC DEVS EST
TOTVM
QVOD DISCITVR.



*Circueierunt in mesotis, in pellibus caprinis, egentes, angustiati,
afflicti, quibus dignus non erat mundus, in solitudinibus erran-
tes, in montibus et speluncis, et in cauernis terra. Paul. Hebr. ii.*
Abr. Bloemaert Inuēt. Boëtius. A. Bolluerd. sculp. et excudit.

Matth. 4.

I E S V S

D V C T V S E S T

I N

D E S E R T V M.

Ambros.
lib. 4. in
Luc. cap. 4.

Genes. 1.

Genes. 3.

Coloss. 3.

CONVENIT recordari, quemadmodum de paradiso in desertum Adam primus eiectus est, ut aduertas, quemadmodum de deserto ad paradisum Adam secundus reuerterit: vides enim, quemadmodum suis nodis preiudicia resoluantur, & suis diuina beneficia vestigiis reformentur. Ex terra virgine Adam, CHRISTVS ex Virgine. Ille ad imaginem Dei factus, hic imago Dei. Ille omnibus irrationabilibus animalibus, hic omnibus animantibus antelatus. Per mulierem stultitia, per Virginem sapientia. Mors per arborem, vita per crucem. Ille spiritualium nudus, arboreis se texit exuviis: hic secularium nudus, corporis non desiderauit exuias. In deserto Adam, in deserto CHRISTVS. Sciebat enim vbi posset inuenire danatum, quem ad paradisum resolutio errore reuocaret. Sed quoniam secularibus indutus exuviis redire non poterat, nec paradisi incola potest esse nisi nudus à culpâ; exiit veterem hominem, nouum induit: ut quia solui non queunt diuina decreta, persona magis quam sententia mutaretur. Sed qui in paradiso sine duce iter amisit acceptum, quemadmodum de deserto sine duce iter repetere posset amissum, vbi tentationes plurimæ, nisus ad virtutem difficilis, lapsus facilis ad errorem. Plenus igitur I E S V S spiritu agitur in desertum: consilio, ut diabolum prouocaret; nam nisi ille certaſſet, non mihi iste vicisset: mysterio, ut Adam illum de exilio liberaret: exemplo, ut ostenderet nobis diabolum ad meliora tendentibus inuidere, & tunc magis esse cauendum, ne mysterij gratiam deferat mentis infirmitas.



Ductus est IESVS in desertum.

S. IOANNES BAPTISTA.

Petrus Da-
mian. ferm.
1. de Nat.
S. Iohannis
Bapt.

BEATVS iste puer, ad eremum spiritu ducente deductus est: nec obstitit ætatis infirmitas, quam maiestas Domini secundabat. Spiritus enim sanctus non attendit differentiam sexuum, fragilitatem corporum, temporum annositatem; sed quemcumque, & quomodo vult, dignantissimâ replet benignitate. Reliquit JOANNES mundum, homines fugit, nescit patriam, parentes adspernatur, & in solius diuinitatis apicem beatæ contemplationis figit obtutus. Mira rerum conuersio, hominem vix mundum ingressum, mundi fugere gloriam, & sæculi cupiditates non solum obliuisci, sed & nescire, perpetuumque cum diuinitate stabilire consortium. Recessus montium, silvarum anfractus, & vallium subteriacens vastitas, puero Patriarchæ domicilia præbuerunt. Non opponatur mihi Jeremias, nec prædicantis pueritiæ virtus audeat obuiare: Quia si ille consecratur in Prophetam, hic in plusquam Prophetam: & licet ille populo futura prædicet, non tamen conuersationis humanæ declinat aspectus. Sic, sic JOANNES ætatis supergressus infantiam, & nobilioris generis generositatem oblitus, soli vacat diuinitati: forma vitæ, Monachorum propositum, Anachoretarum principium, totius religionis assertio. Habebat vestimentum de pilis camelorum, & zonam pelliceam circa lumbos eius: esca autem eius erant locustæ, & mel siluestre. Rigida vestis, & durissimis hispiditatibus circumtexta, rigore squalerifero corpus afficit Patriarchæ, carnemque tenerrimam immatura districtio discipline feritate coarctat, teneros artus & sacratione spiritu superfusos, continui quassat longitudo martyrij. Cibus autem eius qualis erat? Non queruntur Phasides aues, nec per totam discurritur regionem, vt Patriarchalis stomachus impleatur. Sed erat, inquit, esca eius locustæ, & mel siluestre. Cæli rore pascitur, & animalis vilissimi satiatur edulio, nihilque coctum accipit ieiunantis austeritas.

Hierem. i.

Matth. ii.

Matth. 3.



2. S. Ioannes Baptista.

S. PAVLVS I. EREMITA.

Ex D.
Hieron.

SUB Decio & Valeriano persecutoribus, apud inferiorem Thebaidam, cum sorore iam viro traditâ, post mortem amborum parentum, in hereditate locupleti PAVLVS relictus est, annorum circiter quindecim, litteris tã Græcis, quàm Ægyptiacis apprimè eruditus, mansueti animi, Deum valdè amâs. Et cum persecutionis procella detonaret, in villam remotiorem & secretiorè secessit. Verùm sororis maritus cœpit prodere velle, quem celare debuerat. Quod vbi prudentissimus adolescens intellexit ad montium deserta confugiens, grandi speluncâ se conclusit, omnem ibidem in orationibus & solitudine ducens etatem. Cibus & vestimentum ei palma præbebat. Cùm iam centum tredecim annis beatus PAVLVS vitâ cœlestē in terris ageret, & nonagenarius in aliâ solitudine moraretur ANTONIVS, monetur hic diuinitus, vt ad visendū PAVLVVM properaret. Ad quem vbi pervenit, dum in mutuos miscentur complexus, propriis se salutauere nominibus. Soruum interim in ramo arboris consedissee vident. Qui inde leniter subuolans, integrum panem mirantibus attulit. Post cuius abscessum: Eia, inquit PAVLVS, Dominus nobis prædium misit, verè pius, verè milericors. LX. iam anni sunt, quod accipio dimidij semper panis fragmentū: verùm ad aduentum tuum, militibus suis Christus duplicauit annonam. Aëtis igitur Deo gratis fonti assiderunt, Deoq; sacrificium laudis immolantes noctem transgèrere vigiliis. Cumq; iam esset terre redditus dies, mortē suam PAVLVS prædicit, & ab ANTONIO palliū, quod illi Athanasius Ep. dederat, corpusculo suo obuoluēdo deposcit. Quod vbi deferre properat ANTONIVS, videt in reditu, inter Angelorum, Prophetarum, & Apostolorum choros PAVLVVM niueo candore fulgentem in sublime conscendere. Vbi ad speluncâ eius venit, reperit genibus complicatis, erectâ ceruice, extensisq; manibus in altum corpus exanime. Quo obuoluto & prolato foras, hymnos, psalmosq; ex Christianâ traditione decantans, vidit leones duos certatim arenam egerentes, vnius hominis pacem locum effodere. Ille Sancti corporis onere seniles curuauit humeros; & deposito eo in fossam, desuper humum congregans, tumulum ex more composuit.



3. S. Paulus primus Eremita.

S. A N T O N I V S.

Ex S. Atha-
nasio & E-
uagrio eius
interprete.
Matth. 19.

ANTONIVS Ægyptius, nobilibus religiosisque parentibus natus, cum ingressus Ecclesiam ex Euangelio audiuisset: Si vis perfectus esse, vade & vende omnia quæ habes & da pauperibus, & veni sequere me: & habebis thesaurum in cælo: veluti propter se hæc Scriptura esset recitata, ad se Dominicum traxit imperium: statimque regressus possessiones quas habebat vendidit, & aggregato non exiguo pretio indigentibus dedit, & cælestis vitæ genus in terris colere instituit. Virtutum tanto studio incensus fuit, ut quemcumque videret aliquâ virtutis laude excellentem, illum imitari studeret. Nulli igitur primas in virtutibus cedebat. In die autem & vigiliarum intantum patiens erat, ut incredulitatem viribus vinceret. Pernoctabat in oratione sæpissimè, edebat semel in die post solis occasum, nonnunquam biduo triduoque sic permanens, quartâ demum die reficiebatur. Sumebat verò panem & sal, potumque aquæ per paruum. Vestimento cilicino intrinsecus, desuper pelliceo vestiebatur. Quietem membra concedens, iunco contexto atque cilicio utebatur. Nonnunquam etiam super nudam humum iacebat. Cum talis tantusque Dei miles euasisset ANTONIVS, sanctissimum iuuenem hostis humani generis variis tentationibus aggreditur; quas fide, ieiunio, & oratione vincebat. Nec tamen frequens de satanâ triumphus securum reddebat ANTONIVM, qui diaboli innumerabiles nocendi artes nouerat. Itaque contulit se in vastissimam Ægypti solitudinem: ubi quotidie ad Christianam perfectionem proficiens, demones ita contempsit, ut illis exprobraret imbecillitatem. Sic autem demonibus erat formidolosus ut multi per Ægyptum ab illis agitati, inuocato nomine ANTONII, liberarentur. Quintum & centesimum annum agens, cum innumerabiles sui instituti imitatores haberet, sanctitate & miraculis clarus migravit in cælum.



Sanctus Antonius.

4.

B

Ex D. Hieronymo.

HILARION ortus viro Tabathâ in Palæstinâ, cum haberet parentes idolis deditos, rosâ (ut dicitur) de spinis floruit. A quibus missus Alexandriam, magni ingenij & morum documenta præbuit. Audiens tunc celebre nomen ANTONII, incensus visendi eius studio, perrexit ad eremum: apud quem duobus mensibus omnem eius vitæ rationem didicit. Domum reuersus mortuis parentibus, partem substantiæ fratribus, partem pauperibus erogauit. Necdum quintum-decimum annum egressus, rediit in solitudinem: vbi extructâ exiguâ casâ, quæ vix ipsum caperet, humi cubabat. Nec verò saccum quo semel amictus est, vnquam aut lauit, aut mutauit; cum superuacaneum esse diceret, Munditias in cilicio quærere. In sanctarum litterarum lectione & meditatione multus erat. Paucas ficus & succum herbarum, nonnumquam hordeaceum panem ad victum adhibebat; nec illis ante solis occasum vescebatur. Cum diabolus pubescenti corpori insolita voluptatum incendia suggereret, iratus sibi, & pectus pugnis verberans, quasi cogitationes cæde manus posset excludere: Ego te, inquit, aselle, faciam ut non calcitres; nec te hordeo alam, sed paleis: fame te conficiam & siti, graui onerabo pondere, per æstus indagabo & frigora, ut cibum potius quàm lasciuiam cogites. Continentiâ & humilitate fuit incredibili. Quibus aliisque virtutibus varias horribilesque tentationes diaboli superauit, & innumerabiles demones, in multis orbis terræ partibus ex hominum corporibus eiecit. Qui octogesimū annum agens, multis ædificatis monasteriis, & clarus miraculis, in morbum incidit: cuius vi cum extremo penè spiritu conflictaretur, dicebat: Egredere, quid times? egredere anima mea, quid dubitas? Septuaginta prope annis seruisti Christo, & mortem times? Quibus in verbis spiritum exhalauit.



5. Sanctus Hilarion.

B 2

xxi. Octob.

6

S. MALCHVS.

Ex D. Hieronymo.

MALCHVS Nisibeni agelli colonus, solus parentibus suis fuit. Quem cum quasi stirpem generis sui, & heredem familie ad nuptias cogerent, monachum potius se velle esse respondit. Nec patris curans minas, nec matris flexus blanditijs, domum & parentes fugit, pusillum quid portans viatici, quod eum ab inopia tantum defenderet. Ubi ad eremum Chalcidos venit, reperitis inibi monachis, eorum se magisterio tradidit, manuum labore vitium queritans, lasciuiaque carnis refrenans ieiunijs. Inde cum post multos annos, inuito ac reclamante Abbate, ut matris viduitatem solaretur, rediret in patriam, ab Ismaëlitis capitur, & pascendis ouibus destinatur. Quod cum fideliter munus exequitur, conseruam suam alterius coniugem in uxorem ducere cogitur: quare ne maculetur cornubio, seipsum occidere tentat; sed à muliere prohibetur, & castitatem in coniugio simulato seruat vterque. Post grande intervallum dum solus in eremo sedet, coepit tacitus voluere, & inter multa, monachorum contubernia recordari, maximeque vultus Patris, qui ipsum erudierat, tenuerat, perdiderat. Dum hæc cogitat, & formicarum industriam conspicit, tædet eum captiuitatis, & coepit iterum monasterij cellulas querere, ac formicarum illarum sollicitudinem desiderare, ubi laboratur in medium; cumque nihil cuiusquam proprium sit, omnium omnia sunt. Regresso ad cubile occurrit mulier, rogat cur ita exanimatus sit: Audit causam: hortatur ad fugam; non aspernatur. Petit silentium; illa fidem tribuit. Et primo vespere inuadunt iter; hos dominus insequitur. Illi specum subeunt. quò dum tam herus quam seruus penetrat, vterque à læna occiditur. Sublato itaque omni metu, camelos domini conscendunt, & decimâ tandem die ad Romana per desertum castra perueniunt. MALCHVS iungit se rursus Monachis, & illam tradidit virginibus, diligens eam ut sororem, non tamen ei se credens ut sorori.



6. Sanctus Malchus.

S. ONVPHRIVS.

Ex Paph-
nutio Ab-
bate.

ONVPHRIVS Ægyptius, cū esset in cænobio in vrbe Her-
mopoli Thebarum, & audiret de Eliæ Prophetæ & Ioannis
præcursoris vitâ, de nocte surrexit, & egressus de monasterio
ab angelo custode deducitur ad eremum. Hic famem, sitim, frigus
& æstum patienter tulit. Cum seris conuersatus comedit iugiter herba-
rum fructus, in montibus & in speluncis & in vallibus suū reclina-
uit miserabile corpus: alimenta corporalia spreuit, vt dignus acciperet
spiritalia. Sanctus enim Angelus quotidie panem illi offerebat, &
aquam pro mensurâ ministrabat, vt corpus non deficeret, & iugiter
in laude Dei perseveraret. Dactylorum quoque fructus per singulos
dies colligens pro pane sumpsit cum herbarum foliis. Omni die Do-
minico Angelum Domini paratum inuenit, de cuius manu sacrosan-
ctum corpus & sanguinem Domini nostri IESU CHRISTI religio-
sè acciperet. Tanta huic capillorum prolixitas erat, vt corpus illius
ipsorum diffusionem tegetetur. Pro vestimento quoque foliis herbisquæ
tectus, subteriora renū tantummodo cinxit. Iam septuaginta annis
in deserto laboriosè viuens, hominē omnino non vidit, & à Paphnu-
tio Dei monitu inuisitur: quibus inter se sermocinantibus de rebus
cælestibus, sol in occasum vertitur. Surrexerunt ergo, & cum gratia-
rum actione de pane & aquâ modicâ pariter sumpserūt. ONVPHRIVS,
mane factō, de morte quæ sibi instaret admonēs Paphnutium, dixit:
Ne timeas, quoniam omnipotens Deus recto itinere in hanc solitudi-
nem direxit te, vt honorificè sepelias me, atq; corpus meum commen-
des terræ. Post hæc surrexit, & ad Dominum lachrymans orauit, ge-
nua flexit atq; subitō dixit: In manus tuas, Deus, commendo
spiritum meum. Et his dictis moribundus luce cingitur, atque in
ipsius claritate luminis anima sancta carne soluta est, quam Angelicus
chorus festis cantibus excepit, & cælo inuexit. Sacrum eius corpus in
sepulchro, quod excisum erat de petrâ, magnus Paphnutius sepeliuit.



7. Sanctus Onuphrius.

S. PACHOMIVS.

Ex Diony-
sio Exiguo.

PACHOMIVS inferiori ortus Thebaidâ, secundum ritum ac traditionem parentum gentilis, cum inter tirones in Constantini Imp. exercitu mereret, Christianorum charitate illectus, & diuinâ gratiâ gubernante, Christianus effectus est. Monasticam vitam sitiens, Palemonem Anachoretam adiit, cuius monita PACHOMIVS obedienter ac sollicitè suscipiens, totum se disciplinis atque diuinis institutionibus subiungavit. Humilitatis ac patientiæ munere, erga Deum proximumque purissimâ dilectione, præ multis nitebatur excellere. Cum diuinas Scripturas legeret, non id passim negligenterque faciebat, sed solerter examinans ac piâ mente pertractans, studebat indies opere perficere, quæ memoriâ retinebat. Ad humiliandum corpus proprium induebat se plerumque cilicio. Per annos quindecim, post illos ingentes sudores atque labores eximios vigiliarum & abstinentiæ, non iacens somnum capiebat noctibus, sed in medio cellule suæ residens: adeo ut nec dorsum saltem parieti pro sustentatione reclinaret. Arctâ & singulari conuersatione semetipsum affligens, studebat integrum se atque immaculatum in omnibus exhibere. Aeternarum memoriâ pœnarum noxias cogitationes mox repellebat. Consueuerat etiam stans in oratione manus expandere, quas per aliqua horarum spatia minimè colligebat, sed exstensione diuturnâ velut cruci confixum corpus retinebat immobile, & sic animum ad vigilandum in precibus excitabat. Quodam verò tempore cum pro more diutius in orationibus perduraret, diuinitus in Tabennæ vico monasterium edificare iubetur: deinde ab Angelo regulam accipit, quâ docendi forent quicumque ad eius magisterij studia peruenissent. Cum talis tantusque foret PACHOMIVS, assiduâ demonis impugnatione pulsatur, nunc: prestigijs distrahitur, nunc crudelissimè ceditur: sed fortissimus Athleta signo Crucis frontem muniens cuncta demonis molimina proterebat. Centesimum decimum annum agens, angelico conspectu re-creatus, sanctam reddidit animam.



Sanctus Pachomius.

8.

Co.

S. MACARIUS ÆGYPTIVS.

Ex Ruffino
& Palladio.

MACARIUS Ægyptius, triginta annos natus, Asceticam vitam ingreditur; ubi tam excellenter se in omni virtutum genere exercuit, ut omnibus stupori esset. Effoderat ipse à cella sua in dimidium usque stadium cuniculum subterraneum, & inde speluncam non modicam: quò se recipiebat, si quando latere & aduenarum strepitum fugere exoptabat; Viginti quatuor orationes dum recedit, totidemque dum redit, recitans. Cum quidam falsò homicidij accusatus ad eum confugisset, insequente eum apparitorum officio, egressus MACARIUS iussit se ad cadauer duci. Per fidem, inquit, Christi te obtestor, ut dicas si ab hoc homine, qui calumniam patitur, occisus es. Negavit ille. Cumque perorgeret officium, uti nomen homicidæ requireret, abnuuit MACARIUS: Sufficit, inquiens, mihi, ut innocens liberetur, non est autem meum, ut reus prodatur. Alio quoque tempore, cum virgo quedam, quæ magicis artibus in equam versa videbatur, ei offerretur; oleo benedicto & oratione à fascinatione eam liberauit. Cum Hieracita quidam hæreticus eum in fidei contentionem prouocaret, promptissimè se obtulit MACARIUS, non verbis magis quàm re ipsa fidei testimonium præbens. Processerunt igitur ad sepulcra, & hortatur MACARIUS Hieracitam, ut euocaret mortuum in nomine Domini. At ille: Tu, inquit, domine, qui proposuisti, prior euoca. Et MACARIUS prosternens se in orationem ante Dominum, ubi sufficienter orauit, eleuatis sursum oculis suis, ait ad Dominum: Tu, inquit, Domine, quis ex duobus nobis rectam fidem teneat ostende, eleuato mortuo hoc. Et cum hæc dixisset, fratris cuiusdam nomen, qui nuper fuerat sepultus, euocauit. Cui ille cum de tumulo respondisset, accedentes fratres continuo, quæ superposita fuerant, auferunt, & eductum eum de sepulcro, resolutis fasciis quibus constrictus erat, exhibuerunt viuente. Hieracita verò, ubi hæc vidit, obstupescit in fugam vertitur. Quem fratres quoque omnes insequentes, extra terminos terræ illius exturbauerunt. Vixit MACARIUS annos omnino xc. ex quibus in solitudine annos lx. transiit.



9. *S. Macarius Egyptius.*

S. MACARIUS ALEXANDRINVS.

Ex Ruffino
& Palladio.

Deut. 7.

MACARIUS Alexandrinus, eximius eremi cultor fuit, adeò vt penitissima quæque & inaccessa loca penetrârit. Loco, in quo plerumque versabatur, Scete nomen erat, in vastissimâ eremo, nec facile cuius peruiâ. Cùm amicus quidam vram MACARIO detulisset, eâ ille infirmiori cuidâ fratri deferri curat. Ille sibi gratulatus de benigno Patris affectu, mittit eam porrò ad alios fratres: quo factum, vt vna vva per mutua charitatis officia omnium fratrum cellas obambularit, & ad MACARIUM reuerterit. qui mirè fratrum suorum continentiam recreatus fuit. Cùm apud magnum virum & Patrem Antoniũ electos palmæ ramos vidisset, quos ipse laborauerat, petijt ab eo vnum manipulum rorum palmæ. Cui Antonius: Scriptum est. Non concupisces res proximi tui, & ecce rami omnes statim tanquam ab igne torrefacti sunt. Quod quidem cùm vidisset Antonius, dixit MACARIO: Ecce Spiritus sanctus requieuit super te, erisq; mihi deinceps hæres mearum virtutum. Cùm quodam tempore fratris cuiusdam visendi gratiâ, vterq; Macarius nauim conscendisset; reperere ibi tribunos aliquot, diuites admodum ac prepotentes, magno puerorum honorariorum stipatos agmine. Horum vnus cùm videret in ultimâ nauigij parte vilibus indumentis, atque ad omnia expeditos iacere Monachos, ait ad eos; Beati estis vos, qui huic sæculo illuditis, & nequaquam ex eo requiritis, nisi indumentum vilissimum & parcissimum victum. Tunc MACARIUS ALEXANDRINVS respondit: Verè quidẽ, vt dicis, qui Deum sequuntur, illudunt mundo; sed miseremur vestri, quòd vobis econtrario mundus illudit. Cùm diabolus ei longinquas peregrinationes suggereret, duorũ modiorũ sportâ impleuit arenâ & humeris imposuit; atque ita totâ peruadebat solitudinẽ. Cui cùm Theosebius quidam occurrens diceret: Quid portas, abba? Cede mihi onus, & ne vexeris. Ille autẽ dixit; Vexo eum qui me vexat. Nam cùm sit remissus asellus meus, peregrinationes suggerit.



S. Macarius Alexandrinus.

10.

S. A B R A H A M.

Ex sancto
Ephraem.

SANCTVS ABRAHAM, propter eximium IESV CHRISTE amorem, septimâ nocte nuptiarum relinquens intactam sp̄sam fugit, & cellæ se inclusit; vbi diuinâ gratiâ illustratus, quotidie continentia, humilitate atque charitate profecit. Contigit autem anno duodecimo renuntiationis eius, vt parentes ex hac vitâ recedentes aurum ei copiosum prædiaque magna relinquerent, quæ pauperibus erogari fecit. Quare securus animo & mente quietâ mansit. vestis eius sagum & cilicium, quod quinquaginta annorum spatio non mutauit; supellex caucis erat & psathium, in quo cubitare consueuerat. Omnibus omnia factus, equaliter dilexit omnes, honorauit vniuersos. Nec aliquando quenquam procaciter increpauit, sed erat sermo eius charitate & suauitate conditus. Quis audiens eius eloquium dulcedine sermonis saturari potuit? Vel quis vultum illius respiciens, non magis videndi eum sæpius desiderium sumpsit? Erat autem aspectus eius quasi flos quidam immarcescibilis, atque in facie eius puritas animi relucebat. In omni tempore institutionis suæ non præteriuit eum sine lacrymis dies. Abstinentiæ suæ regulam, quam semel arripuit, non mutauit. Quinquaginta siquidem annos magnâ cum deuotione atque humilitate cordis & charitate non fictâ, institutum suum impleuit. Non appropinquauit oleum corpusculo eius; facies eius ac pedes à die conversionis suæ numquam diluti sunt. Non pigritiâ obtorpuit, non segniter egit; sed ita semper extitit, quasi quotidie moriturus. Ad Pontificatus ministerium assumptus, ab idolorum ad vniuersi verique Dei cultum Gentiles adduxit. Verum pristinae consuetudinis amore tactus, reuertitur ad cellam: vbi varijs demonum tentationibus in nomine IESV superatis septuagesimo vitæ suæ anno quieuit in pace. Maximum autem atque admirabile certamen hoc fuit, quod erga Mariam neptem suam gessit, quomodo per sapientiam spiritualem de voragine iniquitatis eam abstraxit. ô miraculum! In ipsum cubile draconis ingressus est, ibique eum pedibus conculcauit, & ex medio dentium eius escam eripuit.



ii. S. Abraham Eremita.

S. BASILIVS MAGNVS.

Ex Basilij
Epist. ad
Chilonem
Anachore-
tam.

Gen. 18.

Gen. 28.

Gen. 32.

Exod. 19.

3. Reg. 18.

2. Esdr. 8.

Matth. 3.

Matth. 26.

Matth. 18.

Matth. 7.

Hebr. 11.

Psal. 16.

PROPTER incommoda, quæ in mundo sunt, persuasus in hos montes quasi volitans passerculus emigraui. Passerculi etenim exemplo exemi me, atque submoui longius à laqueo venantium. Siquidem in hac solitudine (si nescis, ô improba cogitatio) vitam hanc destinavi mihi transigendam, in quâ Dominus meus pro me versatus est. Hic illa est quercus Mambre. Hic inuenire liceat scalam, ad cælum vsque animas rectâ subuehentem. Hic & castra angelorum, quæ se Patriarchæ Jacob spectanda præbuere. Hæc ea est solitudo, in quâ peculiaris Dei Populus præuiâ expiatione collustratus, legem accipere promeruit: denique ad terram prouectus promissionis, Deum contemplatus est. Hic mons celeberrimus Carmelus, in quo Elias demoratus perplacuit Deo. Hic sita est campestris planities, in quâ scorsim à cæteris cum se Esdras submouisset, libros scripture diuinitus inspirata, omnes ex Dei mandato, ad communem omnium vsum eructauit & exprompsit. Hic sita eremus est, in quâ B. JOANNES esitans locustas, formulam penitentiae hominibus perficienda suâ predicatione præscripsit & euulgauit. Hic item mons ille oliuarum, ad quem CHRISTVS ex more secedebat oraturus, nosque orandi formulam edoctrurus. Hic documentum edidit CHRISTVS, quàm deamaret solitudinem: Is enim ait: Vbi duo vel tres congregati fuerint in nomine meo, ibi sum in medio eorum. Hic angusta & arcta est via, quæ ducit ad vitam. Hic Doctores & Prophete in solitudinibus errantes, in montibus, & in speluncis, & cavernis terre. Hic Apostoli & Euangelistæ, ac Monachorum ab urbium aditu longissimè disparata conuersatio. Hæc ex prompto nec illibenti animo complexus sum in hoc, vt quæ martyribus ceterisque in commune sanctis diuinâ promissione reposita sunt, vel ipse tandem promerear accipere, quò nihil adumbratè, sed verissimè depromere illud possim: Propter verba labiorum tuorum ego custodiui vias duras.



S. Basilus Magnus.

D

1. Febr.

Ex Nyssen.
Metaph.
& Vitis Pa-
trum.

Psal. 59.
& 107.

Iob 1.

S. EPHRÆM Syrus, Edessenæ ecclesiæ Diaconus, in Edeſſâ pijs parentibus natus, abstinuit à puero ab omni re malâ. Cuius egregiam sanctitatem ac doctrinam per visum videre parentes; cum ex ore ipsius. EPHRÆM vitis adscenderet valde frugifera, quæ excrescebat & replebat omnem sub cælo regionem. Hic ab ætate iuuenili eremum incoluit, cõpunctionis sibi abyssum vindicâs, per quam & diuinam Spiritus sancti gratiam suscepit. Captus autem desiderio visendæ Edessenorum Urbis, eò concessit; tum vt loca ibi sancta inuiseret, tum vt sapientem aliquem conueniret, ac cognitionis fructum vel caperet ipse, vel alijs præberet. Veniensque in Urbem conuersatus est ibi, & salutaribus suis monitis impudenti femina salutem attulit. Ex impudicâ enim pudicam, ex lasciuâ grauem, ex inquinatâ puram castamq; reddidit. Cæsaream deductus, vidit S. Basilium, quem magnâ voce beatissimus honorabat; nempe qui in humero Basilij dextro columbam stantem aspiceret, & in aures suggerentem, quæ populo referebat. Magnus autem Basilius Spiritu sancto plenus, agnouit EPHRÆM, & dixit ad eum: Tunc EPHRÆM es Syrus? Verè quemadmodum intellexi, sic & in te comperi, quietis amator. Scriptum habetur in prophetiâ Dauid: EPHRÆM fortitudo capitis mei. Nam mansuetudo tua atque clementia & simplicitas clara est, velut lumen apparēs omnibus. Erat enim clemens ac patiens, mansuetus, pudicus ac simplex, in cognitione diuinâ velut omni fuco carens, secundum quod scriptum est, demissus atque modestus, humilis & compunctione plenus, supra fidem; vt etiam ipso tacente vel ex solo aspectu intuentes ipsum, docere videretur. Totus precibus ad Deum fundendis intentus erat; assiduus in cõtēplatione tribunalis (CHRISTI. Hic igitur sanctus Pater, præsciens sui obitus, composuit testamentum ad discipulos & quoscunque monachos; & modicum ægrozans quieuit in Domino.



13. Sanctus Ephrem.

D 2

S. SIMEON STYLITA.

v. Ianuarij.

Ex Anto-
nio eius
discipulo,
& Theo-
doreto.

Matth. 5.

SANCTVS SIMEON. ex utero matris suæ electus est à Domino, & meditabatur parere ac placere illi. Annos natus tredecim, ouium gregibus pascendis à parentibus præfectus est: in quâ functione cum quadam vice multâ viniuium, ouibus domi detentis, ipse ad sacrum templum venisset, accepissetque Euangelicam vocem: Beati qui lugent, quoniam ipsi consolabuntur. Beati mundo corde, quoniam ipsi Deum videbunt. confestim in propinquum monachorum cœtum se contulit, ubi biennio commoratus, inde ad Heliodorum virum exercitatissimum profectus est. Vbi asperissimo fune ex palmarum foliis contexto lumbos cinxit, & totam hebdomadam ieiunus peregit, singulis diebus cœlesti se pane reficiens. Inde angustâ se domunculâ inclusit, & ad exemplum Moysis & Elie quadraginta diebus ieiunauit. Transacto triennio montis verticem conscendit, ibique columnæ insistens, quæ primùm sex, mox duodecim, deinde viginti, demùm triginta & sex cubitorum altitudinis fuit, multitudinem populi vndique ad se confluentem, terrena despicere, cælum suspicere docuit. Eius fama Romæ ita celebris fuit, vt pro omnibus officinarum vestibulis, imagines eius ad tutelam collocatæ sint. Præ ceteris autem eius animi dotibus patientia eius potissimùm admiranda videtur. Nocte enim ac die stans, spectabatur ab omnibus, nisi quòd frequentissimè humi prostratus Deum adoraret, semel tantùm in hebdomadâ cibum capiens. Publicis solemnitatibus aliud patientiæ specimen exhibebat. Nam ab occasu ad ortum Solis, sublati ad cælum manibus totam noctem stabat, neque somno, neque labore defessus. Cum tanto rerum gestarum, miraculorumq; numero splenderet, adeò tamen modestus erat, vt omnium hominum se infimum atque postremum existimaret. Præter modestiam verò ita affabilis ac humanus erat, vt ad cuiuslibet interrogata responderet, animam eius angeli in cælum subuexere.



S. Simeon Stylita.

S. MACARIUS ROMANVS.

Ex Vitis
Patrum.

MACARIUS in Regali ciuitate natus & nutritus, viri Romani filius, cum inuitus ad nuptias traheretur, ipso nuptiarum die, relictâ sponſâ, clam fugit; & ab Angelo sancto Raphaële per angusta montium & vallium deductus ad eremum, ab onagro in viâ dirigitur, & ad locum diuinitus sibi præparatum, Angelo duce, perducitur. Speluncam ingressus duos reperit leonis catulos, matre nutriceque præmortuâ destitutos. Quorum ille curam suscipiens, arborum frondibus eos enutriuit: atque ita annis duobus idē illis cum MACARIO cubile mensaque fuit. Inde diabolus, cuius nunquam à seruis Dei cessat inuidia, mulieris specie MACARIUM decipit. Infelix ille, serò eius aduertens insidias, foras se proripit, & pectus feriens lacrymas vbertim fudit. Ipsi quoque leones, quos enutrierat, in peccati vindictam ab eo fugiunt, donec orâte MACARIO, Deo ita iubente, reuersi sunt. Qui speluncam ingressi, dum humum pedibus suis, ad vnius staturam hominis, effodiunt, ipse brachijs tenuis in foueam descendit; leonibus imperans, vt MACARIUM in eodem sepelirent loco, terram vndique aggerentes. Quod cum factum fuisset, annos tres ita sepultus in eadem fossâ peregit. Exinde cū ingenti fragore spelunca dissiliret, ipse foras manus emittens, herbas in circuitu decerpens in cibum colligebat, Pœnitentiæ triennio euoluto, rediēre ad eum leones; terram egerunt, & toto corpore sanum extrahunt MACARIUM. Qui positus genibus, quadraginta diebus & noctibus, in eodem immobilis permansit loco. Quibus completis, respexit in speluncam, & vidit Saluatorem CHRISTUM, qui speluncâ suâ præsentia expiabat & consecrabat. Ingressus in eam, glorificabat Deum, creatorem omnium, qui MACARIUM tantâ sustinuit patientiâ, perduxit ad pœnitentiam, & talem demonstrauit clementiam. Acta sunt hæc, cum septem annis in speluncâ egisset, nec ipse quadragenario maior esset.



is. S. Macarius Romanus.

Ex Vitis
Patrum.

Num. 21. &
11.

Matth. 6.

Psal. 32.

2. Cor. 11.

F RONTONIVS verus Dei servus, publicam communemque vitam perhorrescens, convocatis aliquot ad se fratribus, in aviam solitudinem secessit. Ubi dum tenui victu vitam tolerant, hostiam laudis Deo offerebant. Qui etsi mundi laqueos fugerant, non effugere tamen demonis insidias; cui nihil inivium, nihil occultum. Suscitatur igitur murmur inter fratres; suggerit, Deum ubique esse; non ruri magis quam in vrbe ad cælum patere aditum; angelorum esse, cibo carere, non hominum. Quibus concitati fratres FRONTONIVM adeunt, ad sæculum redire gestientes, ubi maior annonæ copia. Ille blandè eos solari, salutaribus monitis instruere. Meminissent maiorum, qui in deserto murmurantes à serpentibus depasti sunt. Reuocarent in memoriam diuinum promissum: Nolite cogitare quid manducetis, aut quid bibatis, aut quo operiamini: hæc enim omnia gentes mundi quærunt. Meminissent Prophetici sermonis: Ecce oculi Domini super timentes eum, ut alat eos fame: Rememorarent Apostoli effatum: in fame & siti. Dum hisce aliisque discipulos monitis instruit, ecce tibi Angelus Domini ad diuitem quendam de nocte ait: Tu epularis in diuitis splendide, & serui mei in eremo indigent pane. Ita tertio monitus & increpitus, operari iussit sexaginta camelos, quos nullo ductore in eremum dimisit. Qui iuxta præcinctum montis abeuntes, rectè ad monasterium S. FRONTONII tetendere. Qui letus & exultans spiritu, quod bonus Deus seruis suis cibaria prouiderat; ne tamen auaritiæ spiritu corripere, eulogiarum partem mediam remisit. Ita in posterum nihil FRONTONIO, nihil fratribus defuit; cum quotannis viri diuites, hoc excitati miraculo, certatim annonam in eremum submitterent.



16. Sanctus Frontonius.

E

S. IOANNES IN LYCO.

Ex Ruffino
& Palladio.

SANCTVS JOANNES Ægyptius, cū quinque annos versatus
esset in monasterio, secessit solus in montem Lyco. Ascensus ad
eum difficilis; aditus cellula eius obstructus & clausus, ita vt à
quadragésimo ætatis suæ anno vsque ad nonagesimum, nullus ad
eum intrauerit. Aduenientibus verò per fenestram se videndum præ-
bebat, & inde eis vel verbum Dei ad adificationem, vel, si qua fuis-
set consolatio, responsa reddebat. Mulierum tamen illuc nulla, nec ad
conspæctum quidem eius accessit; sed & viri rarò, & non nisi certis
quibusque temporibus. Cellā sanè hospitalem extrinsecus fieri permi-
sit, in quā aduēiantes paululū requiescerent; ipse verò intrinsecus
solus, solū Deo vacans, non diebus, non noctibus à colloquiis Dei
& oratione cessabat: Diuinum illud & quod super omnem mentē est,
totā mentis puritate consēctans. Quantò enim se ab humanis curis &
colloquiis sequestrabat, tantò illi vicinior & propinquior Deus erat.
In tantā denique mentis sinceritate profecerat, vt non solū eorum,
quæ præsētia erant, scientiam consequeretur à Domino, verū &
eorum, quæ futura erant, præscientiam mereretur. Sanitates quoque
& curas corporum ita deposcentibus conferebat, vt omnem ex hoc ia-
ctantiam fugeret. Non enim permittebat ad se infirmos deferri, sed
benedicens oleum dabat; ex quo peruncti, sani fierent, à quacunque
infirmirate tenerentur. Cibus illi vespertinus erat, & hic exiguus; erat
idem attenuatus & aridi corporis præ abstinentiā: capilli eius & bar-
ba quasi ex languore nimio rara & tenuis. Obseruabat etiam, cū
iam nonagenariam ageret ætatem, vt nullum per ignem paratum su-
meret cibum. Appropinquante verò die obitus, per triduum nullum
ad se introire permisit; & positus genibus in oratione reddidit spiritū,
atq; ita perexit ad Dominum, cui est gloria in sæcula seculorū. Amen.



i7. *S. Joannes in Lyco.*

E 2

S. ELIAS.

Ex Rufino
& Palladio.

SANCTVS Pater ELIAS, senex venerabilis, centum ferè
& decem annorum, vixit in finibus ciuitatis Antinoo,
quæ est metropolis Thebaidis; & fama erat, quòd verè spì-
ritus ELIÆ in eo requieuiſſet. Erat enim valde celebris, &
magnifica de eo referebantur, vt qui in terribili illà ſolitudine e-
giſſet ſeptuaginta annos; cuius deſerti horrorem, terroremque
nullus ſermo dignè poterit exponere. Illic ergo ſedebat ſenior totà
hàc atate, humana habitationis neſciens loca. Semita autem e-
rat anguſta & ſcrupea, quæ ad eum ducebat, quæ vix inueni-
ri à comitantibus poſſet. Locus verò ipſe in quo ſedebat, ſpe-
lunca erat terribilis quædam, & intuentibus plurimum horro-
ris incutiens, adeò vt ipſum quoque videre eſſet formidabile. Tre-
mebat autem iam totus, vt quem ſenectus opprimeret. Inceſſa-
biliter tamen per ſingulos dies ſigna faciebat, & aduenientes ad
ſe quacumque incommoditate conſtrictos, omnimodis reſoluebat.
Cuncti verò patres confirmabant, quòd nullus omnino meminifſet,
quando hic ſeceſſiſſet ad eremum. Cibus ei erat panis exiguus, &
pauciſſimæ oliuæ, vſque ad vltimam ſenectutem. In iuuentute ſe-
ptimanas integras frequenter ieiunaſſe perhibetur. Cùm duo fra-
tres valde corpulenti ad eum veniſſent, ad diſcipulum ſuum ſub-
ridens dicebat; verè, frater, ego erubeſco pro te, quia ſic in ſa-
ginà nutriſti corpus tuum, quia eſca vermium ſumus, cùm pro-
fitearis te eſſe monachum. Pallor enim cum humilitate &
macies, decus eſt monachi. Scitum quoque eius hoc erat:
Ego tres res timco, vnā, quando egreſſura eſt anima
mea de corpore: aliam, quando occuſurus ſum Deo:
tertiam, quando aduerſum me proferenda eſt ſententia.



is. *S. Elias Aegyptius.*

S. T H E O N A S.

Ex Ruffino
& Palladio.

TH E O N A S vir sanctus, in domunculâ seorsum inclusus, triginta annis silentium obseruauit; in tabellâ tantum subinde scribens, gratiam doctrinamq; sui sermonis aduentantibus ad se fratribus ostendebat. Is cum plurimas virtutes faceret, ut Propheta apud suos habebatur. Conueniebat namque ad eum per dies singulos infirmorum plurima multitudo, ad quos ille per fenestram manum proferens, & uniuscuiusque capiti superponens, ac benedicens eos, sanos ab omni ægitudine remittebat. Hic etiam ipso visu tam honorabilis erat, tantumque reuerentiæ gerebat in vultu, ut inter homines Angelus videretur: ita latus oculis, & plenus totius gratiæ apparebat. Huic cum latrones noctu superuenissent, aurum se apud eum inuenturos credentes, oratione solâ ita eos vinxit, ut foribus eius affixi, mouere se omnino non possent. Mane verò cum ad eum turba more solito conuenissent, & viderent ad ianuas eius latrones, volebant eos igni tradere. At ille rerum necessitate compulsus, unum eis solum locutus est verbum: Si nite eos illesos abire, alioquin gratia à me fugiet sanitatum. Populi verò ut audierunt hæc, dimiserunt eos: qui abiectâ scelerum voluntate, & poenitentiâ ducti ad monasteria vicina confugiunt, atque ibi emendationis vitæ formam modumque suscipiunt. Erat autem vir eruditus non solum Ægyptiorum & Græcorum linguâ, sed etiam Latinorum. Comedebat semina non cocta. De nocte progrediens ad eremum, comitatu utebatur plurimo eremi bestiarum. Ipse verò hauriens aquam de puteo suo, & præbens eis pocula, obsequij earum remunerabat laborem. Huius autem rei manifestum dabatur indicium, quod vestigia bubalorum, caprarumque & onagrorum, quibus semper delectabatur, circa eius cellulam plurima deprehendebantur.



19. Sanctus Theonas.

S. H E L E N V S.

Ex Ruffino
& Palladio.

Galat. 5.

HELENVS à pueritiâ in seruitio Domini, cum omni continentia & castissimis institutionibus enutritus, ad summa merita peruenit; adeò vt etiamnum puer, cum in monasterio versaretur, & è vicino petendus esset ignis, ardentis prunas vestimento ferret illæso. Huic quodam tempore, cum solus esset in eremo, desiderium vescendi mellis exortum est: & conuersus vidit in saxo fauum mellis inhaerentem, & intelligens inimici hanc esse fallaciam, continuò semetipsum increpans, ait: Discede à me deceptrix & illecebrosa concupiscentia. Scriptum est enim: Spiritu ambulate, & concupiscentias carnis ne perfeceritis. Alio quoque tempore, cum iam tertiâ septimanâ ieiunus ageret, videt in deserto diuersa sparsim iacere poma: & intelligens dolos inimici, ait: Non manducabo, neque contingam; ne fratrem meum, hoc est, animam meam, scandalizem. Cum & sequenti septimanâ ieiunaret, adfuit ei Angelus Domini, qui ei limpidissimum fontem, eiusque ripas herbis odoratissimis prætextas monstrabat. Atque ita cibo calitus misso refectus est. Cum aliquando fratribus necessaria deferens, oneri succumberet, videns fortuitò pascentes onagros, vnum ex iis euocauit, cui ipse insedit & onus imposuit. Nonnunquam etiam crocodilo vectore flumen traiecit. Et cum quidam quererentur, quòd bestia ea esset pernicies hominum, eandem in siccum educens, dixit ad eam: Melior est tibi mors, quàm tot scelerum & tot homicidiorum inuolui reatu. At ille statim corruens exspirauit. Ad monasterium subinde diuertens, docebat fratres spiritalem doctrinam, ita vt etiam nonnullorum cogitationes cordis, & consilia secreta proferret in medium. Qui agnoscentes ita intra se agi, vitia abdicabant, & virtutes inferebant.



Sanctus Helenus.

20.

F

S. AMMON NITRIOTA.

iv. Octob.

Ex Ruffino
& Palladic.

AMMON locupletibus & generosis parentibus natus, inuitus ad nuptias cogitur. Cum inter nuptiales thalamos conuenissent, ita sponsam ad pudicitiam conservandam inuitat: Corruptio sine dubio inuenit corruptionem, incorruptio verò incorruptionem sperat. Multò ergo melius, si vterque nostrum in virginitate perduret, quàm ut alter corrumpatur ex altero. Acquiescit ei Virgo, silentio tegitur incorruptionis thesaurus. Cumque plurimo tempore, solius Dei contenti testimonio, spiritu magis essent quàm carne sanguineque coniuncti, post obitum amborum parentum, ille quidem ad vicinum deserti secedit locum, interiora montis Nitriæ occupans; virgo verò intra domum residens, in breui & ipsa multitudines virginum, & ille multitudines congregat monachorum. Deductum ad se adolescentem, morsu canis rabidi in rabiem versum, non antè restituit sanitati, quàm ille bouem, quem vidua surripuerat, redderet: quod ipsum furtum spiritu prophetico AMMON cognouerat. Unde timor inuasit adstantes, quòd ea, quæ secretè gesta sunt, non latuerunt hominem Dei. Cum quidam ei cameli vsum ad dolium deferendum, quo aqua colligeretur in commodum aduentantium, denegasset, camelus interit. Fluvium Nilum cum trāsire vellet, & exuere se erubesceret, virtute Dei subito in alteram ripam translatus est. Vixit AMMON sexaginta duos annos, ex quibus viginti in domo paternâ ante nuptias transegit, duodeviginti post nuptias, à consorte suâ secubans, & de die in balsameto se exercens; viginti verò duos in monte Nitriæ. Cuius beatam animam in calū assumi ab angelis vidit S. Antonius; cuius quoque iustitiam atque animi virtutes in summâ admiratione idem habuisse memoratur.



S. Ammon Nitriota.

21.

F²

S. PAVLVS SIMPLEX.

Ex Ruffino
& Palladio.

PAVLVVS cognomento Simplex, cū vxorem suam in adulterio deprehendisset, nulli quidquam dicens, egressus est domum, & mœstitiā animi tactus in eremum secessit: vbi cū anxius oberaret, ad monasterium peruenit Antonij. A quo cū salutis iter inquireret, ille intuens hominem simplicis naturæ esse, respondit ei, ita demum eum posse saluari, si his, quæ à se dicerentur, obediret. Tunc ille omnia quæcunque sibi præciperet, facturum se esse respondit. Vt ergo promissionem eius probaret Antonius, ante fores cellulae stanti; hic, inquit, exspecta me orans donec egrediar. Ille mansit ibi in æstu diei & rore noctis continuò orans. Adeò sollicitus silentij ex obedientiâ obseruator fuit, vt cū Antonius ei quòd rem simplicem proponeret, nutu silentium indixisset, religiosè id coluerit ad stuporem Antonij. Egregiè eum Antonius in obedientiæ virtute exercuit, ea imperans, quæ ratio & causâ non poscerent. Haurire namque aliquando eum aquam iussit ex puteo, & in terram totâ die effundere; contextas sportellas resolueret, ac denuò contexere; Vestimentum diffuere, ac iterum resuere & rursus resolvere. quâ ratione breui ad perfectionem venit. Nam obedientiæ & simplicitatis merito in tantum spiritualium gratiarum culmen ascendit, vt multò plures & potentiores virtutes per ipsum Dominus, quàm per sanctum Antonium faceret. Quos enim ipse Antonius curare non poterat, ad PAVLVVM ablegabat. Deductus est aliquando ad eum rabidus, cui demon erat infestus. Et cū mora curationis fieret, nec celer sequeretur effectus, quasi infantum more indignatus ad Dominum dixisse fertur: verè non manducabo hodie, si eum non curaueris. Et continuò quasi delizioso domino satisfactum est à Deo; & statim curatus est rabidus. Ita bonus Deus cum seruis suis, qui se totos ei deuouere, muneribus certat, illorum se virtutibus quasi oppignorat, & supra omne meritum eosdem remunerat.



S. Paulus Simplex.

S. A R S E N I V S.

Ex Vitis
Patrum, &
eius vitâ.

ARSENIUS Romanus Græco & Latino eloquio clarus, & in Scripturis sanctis eruditus, in Romanâ ecclesiâ diaconus ordinatus, Româ Constantinopolim euocatur, ubi ab Imperatore Theodosio filiorum suorum pædagogus constitutus est. Sed ille aulicæ vitæ pertæsus, orauit ad Dominum, dicens: Domine, dirige me ad salutem. & venit ei vox dicens: ARSENI, fuge homines, & salua-beris. Idem ipse discedens ad monachilem vitam, rursum orauit eundem sermonem. Audiuitque vocem dicentem sibi: ARSENI, Fuge, tace, quiesce. hæc enim sunt radices non peccandi. Itaque vili indutus amictu in vastam Scetis solitudinem contendit. Cum ad eum matrona Romana magnis itineribus peruenisset, rogaretque ut in memoriâ se habere dignaretur, respondit: oro Deum meum, ut deleat tuam ex corde meo memoriam. Quotiescunque autem in ecclesiam cum aliis patribus conuenisset, post columnam sedebat, ne aut ipse alterius, aut alter ipsius faciem inspicere posset. Rogatus, cur non mutaret aquam palmarum, quæ fætebat, respondit: pro thymiamate & odoribus vnguentorum, quibus in sæculo usus sum, opus est uti me nunc fœtore isto. In oratione adeo perseverans fuit, ut totis sæpè noctibus orans perduraret, ut quem Sol occidens orantem conspexerat, eundem rursus oriens orantem reperiret, Hic autem sermo semper erat in ore eius: ARSENI, propter quid è sæculo exiisti? sæpè quoque dicere solebat. Loqui me semper pœnituit, tacere nunquam. Qui idem vir insignis cum teneretur amore beatitudinis lugentium & consolationis, quæ eis promittitur, non cessauit lugere, in tantum ut gremio subesset pannus, quo lachrymas abstergeret, quæ fluebant ex oculis. Atque hæc eius erant quotidiana exercitia, quousque verè beatam tradidit animam, cum vixisset inter Eremitas annos quinquaginta quinque; obiit autem nonaginta quinque annorum.



Sanctus Arsenius.

23.

S. B O N O S V S.

Hierony-
mus ep. 4. 1.
ad Ruffin.

Genes. 28.

Matth. 16.

Luc. 9.

Psal. 125.

Num. 21.

Matth. 11.

1. Thessal. 4.

Ephes. 6.

Deut. 8.

1. Timoth. 6.

Gal. 6.

Philip. 1.

BONOSVS tuus, imò meus, & (vt veriùs dicam) nosler, scam Iacob iam scandit, portat crucem suam, nec de crastino cogitat, nec post tergum respicit. Seminat in lacrymis, vt in gaudio metat, & sacramento Moysi serpentem in eremo suspendit. Ecce puer, honestis sæculi nobiscum artibus institutus, cui opes affatim, dignitas apprimè inter æquales erat, contemptâ matre, sororibus, & carissimo sibi germano, insulam pelago circumsonante naufragam, cui asperæ cautes, & nuda saxa, & solitudo terrori est, quasi quidam nouus paradisi colonus insedit: nullus in tantâ vastitate adhaeret lateri comes; solus ibi (immò iam Christo comitante non solus) videt gloriam Dei, quam etiam Apostoli nisi in deserto non viderant. Non quidem conspicit turritas vrbes, sed in nouæ ciuitatis censu dedit nomen suum. Horrent sacco membra deformia, sed sic meliùs obuiam Christo rapietur in nubibus. Nullâ euriporum amœnitate perfruitur; sed de latere Domini aquam vitæ bibit. Totam circa insulam fremit insanum mare, & sinuosis montium illis scopulis æquor reclamat. Nullo terra gramine viret, nullis vernans campus densatur umbraculis: abruptæ rupes quasi quendam horrore carcerem claudunt. Ille securus, intrepidus, & totus de Apostolo armatus, nunc Deum audit, dum diuina relegit; nunc cum Domino loquitur, dum Deum rogat; & fortasse, ad exemplum Ioannis, aliquid videt, dum in insulâ commoratur. Quas tu diabolum neçtere credis tricas? quas parare arbitraris insidias? Forsitan antiquæ fraudis memor, famem suadere tentabit; sed iam illi responsum est: Non in solo pane viuit homo. Opes forsitan gloriamque proponet; sed dicetur illi. Qui cupiunt diuites fieri, incidunt in muscipulam & tentationes. Fessa membra ieiuniis, morbo grauante concutiet; sed Apostoli repercutietur eloquio: Quando infirmor, tunc fortior sum. Minabitur mortem, sed audiet: Cupio dissolui & esse cum Christo.



24. *Sanctus Bonosus.*

G

xxx. Septē.

Ex Hieron.
Epist. 22. ad
Eustochiū.

QUOTIES ego ipse in eremo constitutus, & in illā vastā solitudine, quæ exusta solis ardoribus, horridum monachis præstat habitaculum, putabam me Romanis interesse deliciis! Sedebam solus, quia amaritudine plenus eram: horrebant sacco membra deformia, & squalida cutis situm Æthiopice carnis obduxerat: quotidie lacrymæ, quotidie gemitus; & si quando repugnantem somnus imminens oppressisset, nuda humo vix ossa hærentia collidebam. De cibis verò & potu taceo, cum etiam languentes monachi aquā frigidā vtantur, & coctum aliquid accepisse, luxuria sit. Ille igitur ego, qui ob gehennæ metum tali me carcere ipse damnaueram, scorpionum tantum socius & ferarum, sæpè choris intereram puellarum: pallebant ora ieiuniis, & mens desideriis aestuabat in frigido corpore, & ante hominem suum iam carne præmortuā sola libidinum incendia bulliebant. Itaq; omni auxilio destitutus, ad IESV iacebam pedes, rigabam lacrymis, crine tergebam, & repugnantem carnem hebdomadarum mediā subiugabam. Nō erubesco confiteri infelicitatis mee miseriam; quin potius plango, me non esse, quod fuerim. Memini me clamantem, diem crebrò iunxisse cum nocte, nec prius à pectoris cessasse verberibus, quàm rediret, Domino increpante, tranquillitas. Ipsam quoque cellulam meam, quasi cogitationum mearum consciam, pertimecebam; & mihi met iratus & rigidus, solus deserta penetrabam: & sicubi concaua vallium, aspera montium, rupium prærupta cernebā; ibi mee orationis locus, ibi illud miserrimæ carnis ergastulum: &, vt ipse testis est Dominus, post multas lacrymas, post cælo inherentes oculos, nonnumquam videbar mihi interesse agminibus Angelorum; & letus gaudensque dicebam: Post te in odorem vnguentorum tuorum cucurrimus.

Cant. 2.



25. Sanctus Hieronymus.

G 2

S. Ambr. lib. de Viduis.

CASTITAS
SOLITVDINEM

QVÆRIT
PV DICA
SECRETVM

IMPVDICA
CONVENTVM.



SACRA
EREMVS
ASCETRIARVM.

*Exultabit solitudo, et Florebit quasi Lilium. Germinans
germinabit, exultabit letabunda et laudans. Isaia 35.*
A. Bloemaert Inu. B. A. Bolluere. Sculp. et exc.

M A R I A

D E I

M A T E R.

Hieron. in
Osee c. 13.

ADDUCET vrentem ventum Dominus de deserto
adscendentem: *Desertum intelligimus sancta MARIÆ
vterum Virginalem, quod absque semine humano nullo fru-
tice pullulauerit: sed virga simplex atque purissima, & vnioue se-
cunda, ediderit eum florem, qui dicit in Cantico Canticorum: Ego
flos campi & lilium conuallium.*

Cant. 2.

Hiero. epi.
7. ad Latā.

Ambr. li. 4.
epist. 31. ad
Sabinum.
Luc. 1.

MARIAM solam in cubiculo suo reperit Gabriel: & ideo for-
sit an timore perterrita est, quia virum, quem non solebat, adspexit.

SO LA erat MARIA, & loquebatur cum Angelo; sola erat,
quando superuenit in eam Spiritus sanctus, & virtus Altis-
simi obumbravit eam; sola erat, & operata est mundi salutem,
& concepit Redemptorem vniuersorum.

Hieron lib.
2. in Lucā.

SO LA in penetralibus, quam nemo virorum videret, solus An-
gelus reperiret, sola sine comite, sola sine teste, ne quo degenerare de-
prauaretur affatu, ab Angelo salutatur. Disce virgo verborum vi-
tare lasciuiam. MARIA etiam salutationem Angeli verebatur.

mbro. li.
2. in Lucā.

MARIA leta pro voto, religiosa pro officio, festina præ gaudio,
in montana perrexit. Quo enim iam Deo plena, nisi ad superiora
cum festinatione contenderet? Nescit tarda molimina sancti Spiritus
gratia.

Hiero. epi.
17. ad Mar-
cellam.

MARIA Mater Domini, postquam ad eam Angeli facta est
promissio, & vterum suum intellexit esse domum filij Dei, derelictis
campestribus ad montana perrexit. Hæc enim terra montuosa, &
in sublimi posita, quantum à delicijs sæculi vacat, tantò maiores hæ-
bet delicias spiritus.



i. S. Maria Mater Dei.

S. MARIA MAGDALENA.

Ex vitâ eius
per Radul-
phum Ar-
gentem.

MARIA MAGDALENA, nobilibus & copiosis parentibus nata, post Dominicæ resurrectionis gloriam, Ascensionisque triumphum, ac Spiritus paracliti de supernis promissionem, qui discipulorum corda tēporalis pœnæ adhuc formidine trepidantia, scientiâ omnium linguarū illustrauerat, cum fratre, sorore Marthâ, & Marcellâ ped sequa, ac Maximino (vno ex septuaginta duobus discipulis Christi Domini, qui totam illam domum baptizauerat) multisque aliis Christianis comprehensa à Judæis, in nauem sine velo ac remigio imponitur, vastissimoque mari ad certum naufragium committitur: sed navis, Deo gubernante, saluis omnibus Massiliam appulsa est. Eo miraculo & horum prædicatione, primùm Massilienses, mox Aquenses ac finitimæ gentes in Christum crediderunt: Lazarusque Massiliensium & Maximinus, Aquensium Episcopus creatur. MAGDALENA verò assueta orationi & pedibus Domini, ut optimâ parte contemplandæ cælestis beatitudinis, quam elegerat, frueretur, in vastam altissimi montis speluncam se contulit, ubi triginta annos vixit ab omni hominum consuetudine disuncta, quotidieque per id tempus ad audiendas cælestium laudes septies in altum ab Angelis elata. Appropinquante verò tempore, quo beatæ carnis ergastulo solueretur, vidit Dominum, cui se omni pietatis studio mancipauerat, ad cælestis regni gloriam misericorditer se vocantem; ut cui temporalis vitæ subsidium in terrâ ministrauerat, ab ipso cælestis vitæ pabulum sine fine gratulabunda perciperet. Transiit autem vndecimo kalendas Augusti. Cuius sanctissimum corpus beatus Maximinus Antistes assumens, diuersis conditum aromatibus in honorifico collocavit mausoleo, construens super beata membra mirabilis architecturæ basilicam.



2. *S. Maria Magdalena.*

S. E V G E N I A.

Ex Vitis
Patrum.

EVGENIA fuit sub Commodio Imperatore filia Philippi, viri clarissimi, in urbe Româ. Missus autem pater ab Imperatore in ciuitatem Alexandria, vt præfecturæ magistratum gereret, secum vexit uxorem & proles; quarum vna fuit beata EVGENIA: quæ cum litteras edisceret, & in multorum librorum lectione versaretur, incidit in Epistolas S. Apostoli Pauli, ex quibus Christi fidem didicit. Cum anno quintodecimo ætatis ei sponsus proponeretur, illustrissimis ortus natalibus, respondit: Maritus moribus, non maioribus eligendus est. Inde patrios tumultus & mundi fallaciam derelinquens, cum duobus eunuchis ad monasterium, quod est ante ciuitatem Alexandria, se contulit, virili habitu induta. Accepto igitur hospitio ab Heleno Heliopolis Episcopo, declarans quare illuc venisset, diuino baptismo cum iis, quos secum duxerat, lustrata, est, & in ordinem monachorum aggregata; & post aliquod tempus monasterij curam sibi creditam suscepit. Vbi propter miracula, quæ per illam Deus efficiebat, facta est familiaris mulieri cuidam ordinis senatorij, quæ Melanthia vocabatur: accusata postea est ab illâ, quasi ad stupri consuetudinem illam prouocasset; crimen obiciens, quod illius naturæ repugnabat: existimans enim maræ esse propter speciem habitus, eius pulchritudine vulnerata, cum sæpe periculum faciens ab eâ repulsa esset, detulit illam ad Philippum Præfectum: Cum verò is illam accersiri iussisset, veritas detecta est, non solum quod in habitu viri esset mulier, sed etiam quod Præfecti esset filia: quare patrem, & matrem, & multos ex familiâ, ad Christianorum fidem attraxit; & pater quidem Præfecti dignitate depositus, baptizatus est, postea & martyrij perfectionem assecutus, irruentibus in eum in templo idolorum infidelibus, qui & illū gladiis interfecerunt: Sancta verò EVGENIA Romam adducta est cum matre & fratribus, Proto & Hyacintho eunuchis, qui obtruncati sunt; ipsa verò saxo graui alligata in Tiberim flumen proiecta est; atq; illinc seruata, gladio consummationē accepit.



3. Sancta Eugenia.

H 2

S. E V P H R A X I A.

xii. Martij.

Ex Vitis
Patrum.

EVPHRAXIA Virgo Constantinopolitana, Theodosij iunioris consanguinea, defuncto Patre ab Euphrasia matre Theodosio commendata, Senatorio cuidam viro quinquennis despoëdetur. Illa verò discedens cum matre, in Thebaidem Ægypti profecta est, & monasterium ingressa, in quo erant virgines centū & quatuor, parem Angelis vitam ducentes; & emulata earum virtutem, à monasterio ipso discedere passa non est. Vbi consentiente matre ab Abbatisa cilicino habitu monasterij induitur. Iam mater eam Domino commendauerat, cum mox humilitate & sancta conuersatione polle-
re cœpit; & mirā in cunctis ministeriis obedientiā superauit vniuer-
sas. Mater verò illinc discedens Orientis monasteria obeundo, pos-
siones multas & beneficia indigentibus cētulit. Post hæc, cum in mor-
bum incidisset, reuersa est ad mansionem, in quā filiam reliquerat:
cumque omnes facultates filie commisisset, requieuit in Domino.

EVPHRAXIA verò cum bona omnia pauperibus & ecclesiis Dei distribuisset, monastica vitæ exercitationem egregiè amplexa, tantū
in virtute profecit, & necessitates corporis subiugauit, vt per quadra-
ginta quinq; dies immobilis steterit, intentis ad cœlū manibus. Mul-
tas diaboli tentationes pertulit, quas abstinentiā vicit. Nam & la-
pidem capiti supposuit, & cinere stratum conspersit. Verū enimvero
cum diabolus hanc omnino superare nō posset, aliis modis instat. Cum
ex puteo hauriret aquam, capite deorsum à dæmone præcipitatur, sed
à sororibus incolumis educitur: deicitur è solario, & illæsa reperitur.

Ceterū propter excellentes virtutes beata EVPHRAXIA miracu-
lorum gratiam accepit, quā multos à variis languoribus liberauit.

Cum ei dies mortis diuinitus abbatissæ monitu nuntiaretur, valde
indoluit, quod tam citò euocaretur ex hac vitā, antequam plenè se ex-
piasset. Cur, inquit, Domine, abominatus es me peregrinam & or-
phanam? cur despexisti me? Ecce tempus, quando debebam cum dia-
bolo pugnare, & anima mea à me expetitur.



4. *Sancta Euphraxia.*

S. E V P H R O S Y N A.

Ex Vitis
Patrum.

EVPHROSINA virgo, beati Paphnutij Ægyptij filia, septennis baptisatur. A multis in uxorem expetita, tandem viro clarissimo & ditissimo despondetur. Cum esset octodecim annorum abiit cum eâ Pater ad monasterium, ut illam precibus Abbatis commendaret, qui locutus est cum eâ; & benedicens exhortabatur ad castitatem, humilitatem, & patientiam timoris Domini: cœpitque cor eius esse sollicitum, & monasterij mores sedulo perscrutari. Instructa tandem à sene monacho tondetur, & habitu induta virili, eunuchum se simulans, relictâ domo, ad monasterium festinat; ibique admissa Smaragdum se nominat, & consignatur in monachum: deinde Agapito erudienda traditur: & quia pulchrâ erat facie, Abbatis iussu solitudo ei precipitur, ne sit alius scandalo. Fecit autem Agapitus omnia, quæ sibi à Patre monasterij fuerant imperata; & introduxit Smaragdum in cellam solitariam; ubi orationibus vacabat, ieiuniis & vigiliis nocte ac die operâ dabat, seruens Domino in simplicitate cordis. Anxius interea pater, EVPHROSINAM iubet inquiri; quâ non repertâ, tâquam mortuam lugebant eam; socer nurû, sponsus spôsâ, pater filiam. Pergit pater ad monasteriû, rogat, orent Dominum ut dignetur ostendere, quid factum sit de filiâ Paphnutij: sed nihil eis reuelatum est; oratio enim EVPHROSINÆ erat ad Deum die noctuque, ne manifestam eam faceret in vitâ suâ Deus. Abbas Paphnutiû consolatur, & afflictum nescius ad filiam misit, ut patrem filia consolationibus attolleret. A filiâ cognitus non cognouit eam, quia species vultus emarcuerat præ nimia abstinentiâ, vigilijs & lacrymis. Mœrentem itaque patrem solatur filia, & ille iam letior domum reuertitur. Compleuit autem Smaragdus in cellâ solitariâ triginta & octo annos, & incidit in infirmitatem; cognoscens ergo, quia instabat dies dormitionis eius, vocauit Paphnutium patrem, & cum se ei reuelasset, tradidit spiritum.



Sancta Euphrosyna.

xxix. Octo.

S. MARIA NEPTIS ABRAHÆ.

Ex sancto
Ephraem.

MARIA defunctis parentibus, vnica relicta filia, Abraham cremita, qui eius erat patruus, committitur. Docebat eam ille psalterium & scripturas; atque ipsa in omni abstinentiâ emulari suum patrum nitebatur. Exultabat Abraham patruus eius, sic eam promptam sine vllâ hesitatione in cunctis virtutibus promoueri, in lacrymis, in humilitate, in modestiâ, in quiete, & quod his sublimus est, erga Deum eximiâ charitate. Viginti siquidem annis in abstinentiâ degens, velut agna pudicissima atque incontaminata columba patruo convixit. Quo tempore annorum expleto, seniebat aduersus eam diabolus, & insidias pretendebat, vt eam suis cassibus irretiret. Insiabiatur ille, donec vinceret. Itaque constuprata, patrum deserit, seq; stabulario locat, & biennio luxuriatur; sed sanctus Abraham de lapsu neptis in visione monitus, die noctuque nunquam pro eâ Dominû deprecando relaxauit animum, quousq; sub militis schemate turpitudinis locum ingressus est. Illa complexa cervicē eius, osculis demulcebat. Cumque oscularetur eum, odorata eius corpusculum suauissimo odore abstinentiæ fragrare, recordata est dierum, quibus cū summâ abstinentiâ vixerat; & quasi quodam telo percussa in animo vehementer ingemuit; lacrymasque profudit; & tanquam vim cordis non sufferens, in hæc verba prorupit: *Va, va, mihi misera soli solatus eam est Abraham, & cum gaudio cellule restituit. Hic induta cilicio, in humilitate cordis, oculorum fletibus perdurabat; vigiliis quoque arctissimisque abstinentiæ laboribus semetipsam conficiens, spe veniæ firmissimâ proprium deplorabat scelus; tam iugiter deprecationibus vacans, vt nullus non illacrymaret, qui vocem fletus eius audiret. Sic autem Dominum, vt sibi ignosceret, exorabat, vt signum aliquod acceptæ pœnitentiæ diuinitus postularet, & post triennij plenitudinem obtineret.*



6. *S. Maria Neptis Abrahæ.*

S. THAISIS PECCATRIX.

Ex Vitis
Patrum.


THAISIS ab adolescentiâ suâ fuit à propriâ matre deprauata, seque officinâ diaboli constituit. Sed à viro sancto Paphnutio conuersa est, & pœnitentiâ scelerum compuncta, collectis omnibus quæcunque ex peccato susceperat, prolatisque in mediâ ciuitate, populo spectante, igni supposuit: erat autem pretium librarum quadraginta. Posthæc ad locum à Paphnutio constitutum venit; quam ille, reperto virginali monasterio, in cellulâ paruâ recludens, ostium cellulæ plumbo signauit, paruamque reliquit fenestellam, per quam ei cibus modicus inferretur, iussitque ei omnibus diebus parum panis & aquæ à sororibus monasterij ministrari. Cùm autem discederet ostio plumbato, ait ad illum THAISIS; Quò iubes, pater, ut aquam meam effundam? at ille respondit: In cellâ, ut digna es. Cùmque iterum, quemadmodum Deum oraret, requireret, dicit ei: Non es digna nominare Deum, nec in labijs tuis nomen diuinitatis eius adducere, sed nec ad cælum manus expandere: quoniam labia tua iniquitate sunt plena, & manus tuæ sordibus inquinatæ; sed tantummodo sedens contra Orientem respice, hunc sermonem solum frequenter iterans: Qui plasmasti me, miserere mei. Post trium verò annorum pœnitentiam Abbas Paphnutius rediens, post reuelationem sibi à Deo de illâ factam, ostium, quod plumbo signauerat, dissipauit. dixitque ei: Egredere, quia dimisit tibi Deus peccata tua. At illa. Testor, inquit, Deum, quia ex quo huc ingressa sum, ex omnibus meis peccatis quasi sarcinam feci mihi, & ante oculos meos statui; & sicut non recessit anhelitus de naribus meis, ita nec quidem vno momento vsque ad hanc horam peccata mea recesserunt à me. Et cùm eam inde eduxisset, quindecim tantum diebus THAISIS vixit, & sic pausauit in pace.



7. *Sancta Thais.*

S. PELAGIA PECCATRIX.

PELAGIA Antiochena, pantomimarum prima, corpore pulcherrima, habitu ambitiosa, cum Ecclesiam ingressa beatissimum Nonnum de futuro iudicio & cœlesti gloriâ sincerissimè loquentem audiisset; subito compuncta est timore Domini. Et statim venit ad locum ubi congregati erant Episcopi, apprehensisque pedibus beati Nonni dixit: Rogo te, Domine meus, imitare magistrum tuum Dominum IESUM CHRISTUM, & fac me Christianâ. Ego enim sum Domine meus, pelagus peccatorum, & abyssus iniquitatis. Peto me baptizari. Deinde iussa surgere, cum audisset Canones inhibere meretricem baptizari, nisi dato fideiussore; iactavit se iterum in paupertum: & apprehensos Sancti Nonni pedes lachrymis lauit & capillis suis exergebat dicens: Rationem reddes Deo pro animâ meâ, & tibi adscribâ iniquitates meas, si distuleris me iniquam & turpissimam baptizare. Quo audito, Nonnus Episcopus exorcizatâ baptisavit, & imposuit ei signû Domini, tradiditque illi corpus Christi. Hinc diaboli plandus contra Nonnum: hinc eiusdē blanditiæ erga PELAGIAM. sed illa crucis se signo muniens, insufflauit in hostē, & statim nusquā cōparuit. Porro datis omnibus facultatibus suis in vsum pauperum, orphanorū viduarumque expendendis, illa octauo die, quando vestis alba deponenda erat, de nocte, omnibus inscijs, albâ depositâ, & cili-ciū induta, petijt Hierosolymam; ubi in monte Oliueti, constructâ cellulâ, nomen assumens PELAGII, quasi Eunuchus sanctē conuersatur. Accidit post hæc ut Diaconus quidam Hierosolymæ loca sancta & PELAGIAM visitaret; sed agnoscentem se non agnouit; quippe quæ pulcherrima fuerat; iâ præ inedia in marcorē versâ erat. Oculi enim eius sicut fossæ videbâtur. Magna interim famâ vagabatur de PELAGIO, quare secundo eâ visitat, & mortuum inuenit cuius dum corpus lauatur & vngitur, PELAGIVS femina deprehenditur. Exclamauerunt igitur voce magnâ dicentes: Gloria tibi Domine IESU CHRISTE, qui multas diuitias abscondas habes super terram, non solum viriles, sed etiam muliebres. Cum cereis itaque, lampadibus & hymnis sacrum corpus à Patribus sepelitur.



Bolz. fec.

8. Sancta Pelagia.

11. April.

S. MARIA ÆGYPTIACA PECCATRIX.

Ex Sophro
nio Episc.
Hierosol.

MARIA ÆGYPTIACA duodennis, spretis parentibus Alexandriam venit, ubi decem & septem annis insatiabiliter vitio libidinis subiugata iacuit; adeoque quod plures ad eam concurrerent, gratis quoque sceleris implevit desiderium, mendicans interim, vel stupam filando victitans. Contigit interea multos Hierosolymam nauigare ob Sanctæ Crucis exaltationem; quod cum & ipsa, non pietatis ergo, sed ut multos haberet suæ libidinis cooperarios, ascendisset, & usque ad templi limina processisset, aliis & aliis ingredientibus illa diuinitus repulsa, intra templum non admittitur. Hoc ter & quater passa, tandem intellexit se ob scelera ab aspectu sanctæ Crucis arceri. Itaque compuncta beatissimæ virginis Mariæ suffragia implorat, ut sanctam Crucem videre possit, promittens se ex hoc nunquam ultra suam carnem coinquinaturam. Nec moratentat ingredi; & nullum sentit, ut prius, ingrediendi obstaculum; quin magis, ut randa mare sic eam turba intro impellere videbatur. Tunc illa pro voto lignum sanctum adorauit, ac deinde egrediens ad locum, ubi Dei Matri promissionem fecerat, voce missa calitus docetur, quid facere debeat. Itaque festinanter acceptis tribus panibus in eremum tetendit. Vbi quadraginta & septem annis sic vixit, ut nec hominem nec animal viderit, sed ipsum Deum solum spectatorem habuerit. Consumptis panibus, quibus septendecim annis victitabat, herbis nutriebatur. Sed & vestimentis eius disruptis atque putrefactis, pruinis postea hyemalibus & æstiuis ardoribus ita cruciata fuit, ut multoties in terram cadens absque spiritu iaceret immobilis. Primis decem & septem annis immensis tentationibus exagitata, Dei gratiâ victrix euasit. hanc denique Zozimas ad eam eremi partem veniens inuenit, cui sacrosancta mysteria in vespérâ sanctæ Cœnæ ministravit, ac demum leonis ministerio iam ab anno defunctam sepeliuit.



9. *S. Maria Aegyptiaca.*

S. MARINA VIRGO.

Ex Vitis
Patrum.

MARINA virgo Alexandrina, habitu & nomine mutato, à patre Monacho deducitur ad monasterium, & MARINVS vocatur. Quæ cum esset annorum quatuordecim cœpit eam docere pater suus viam Domini. Dum autem facta esset annorum decem & septem, defunctus est pater eius. Remansit verò hæc sola in cellâ patris sui, & erat obediens omnibus in monasterio: ita ut ab Abbate suo & ab omnibus diligeretur. Iussus ab Abbate frequenter ibat ad emporium, ut afferret necessaria domus, & ibidem cum ceteris monachis, si quando scrius esset, manebat in pandochio. Contigit autem per insidias inimici ut pandox ille haberet filiam virginem, ad quam ingressus miles stuprauit eam, & gravidam reliquit. Detectâ fraude, cœpere parentes affligere puellam, ut autorem sceleris proderet. Illa MARINVM nominat. Parentes itaque ad Abbatem pergunt, & MARINVM monachum fornicationis accusant. Vocata venit & peccatum quod non admisit, quasi à se perpetratum agnoscit. Iratus Abbas, iubet eam contundi, affligi & e monasterio eijci. Ipsa verò nunquam ulli confessa est arcanum suum, sed eiecta posuit se in terra ante fores monasterij affligens se tanquam ipsa peccasset, & ab ingredientibus fratribus postulabat, ut vel vna buccella panis ei daretur, ut nutrirer filium alienum. Elapsis annis quinq; rursus in monasterio admittitur, & vilissima obit ministeria: Sanctæ vero libenti hæc animo suscipiens, omne opus quod ei iussu fuerat, sedulo perfecit. Contigit autem eam intra paucos dies dormire in Domino, & cognouerunt quia femina esset. Fornicaria à demone arrepta prodit hominem, qui deceperat eam, & apud sacrum corpus MARINÆ liberatur. Quæ fama ubi per totum emporium, & vicina loca sparsa fuit, ingens accurrit multitudo ad sacrum MARINÆ Oratorium, cum crucibus, ceris, Hymnis, & Psalmis eius funus prosequens, & opem eius implorans.



io. *Sancta Marina.*

K

Ex Diuo
Hieron.

Leuit. 13.

FABIOLA, post diuortium factum cum priori viro, secundas nuptias illicitè contraxerat: sed post eius mortem in semet reuersa, saccum induit vt errorem publicè fateretur, & totâ vrbe spectante Romanâ, sletit in ordine pœnitentium. Dissoluta habuit latera, nudum caput, clausum os. Non est ingressa Ecclesiam Domini, sed extra castra cum Mariâ sorore Moyse seperata consedit: vt quam sacerdos eiecerat, ipse reuocaret. Receptâ sub oculis omnis Ecclesiæ communione, quid fecit? Scilicet in die bonâ malorum non oblita est: & post naufragium, rursus tentare noluit pericula nauigandi; sed prima omnium Nosocomium instituit, in quo egrotantes colligeret de plateis, & consumpta languoribus atque inediâ miserrum membra foueret. Quoties morbo regio & pudore confectos humeris suis ipsa portauit! Quoties lauit purulentam vulnerum saniem, quam alius aspicere non valebat! Præbebat cibos propriâ manu, & spirans cadauer sorbitunculis irrigabat. Quod monasterium non illius opibus sustentatū est? Quem nudū & clinicum non FABIOLÆ vestimenta texerunt? In quorum se indigentiam non effudit præceptum & festina largitio? Angusta misericordiæ eius Roma fuit. Ergo peragratis insulis monachorum choros visitat, & Ierosolymam nauigat ministrare sanctis. Quæ cum ita solitudinem cuperet, vt diuersorio MARIÆ carere nollet ecce Hunnorum in Romanum orbem irruptio: quare cum aliis nauē conscendere & in Italiâ remeare compulsâ est, vt ibi pauper viueret vbi diues fuerat. Sed Romana cernens mœnia, inclusam se esse plangebatur. Oblita sexus, fragilitatis immemor, ac solitudinis tantum cupida, ibi erat vbi animo morabatur. Sic festinabat, sic impatiens erat morarum, vt illam crederes profecturam. Itaque dum semper paratur, mors eam inuenire non potuit imparatam: dormiuit illa quomodo voluit, erogatis antè in monachos & seruos Dei facultatibus, & depositâ tandē sarcinâ leuior volauit ad cælum.



ii. *Sancta Fabiola.*

xxvi. Ian.

Ex Diuo
Hieronym.

PAULA, nobilissima Romanorum vidua, relictis omnibus, cum solâ Eustochio Româ soluit; & venit Ierosolymam, ubi cuncta loca tanto ardore ac studio circumiuit, vt nisi ad reliqua festinaret, à primis non posset abduci. Quid ibi lacrymarum, quantû gemituum, quid doloris effuderit, testis est cuncta Ierosolyma, testis est ipse Dominus, quem prostrata, quasi pendentem in cruce cerneret, adorabat. Nec multo post in sancta Bethlehem mansura perpetuò, angusto per triennium mansit hospitio, donec extrueret cellulas ac monasteria, & diuersorum peregrinorum iuxta viam conderet mansiones, in qua MARIA & IOSEPH hospitium non inuenerant. Hic tantâ se humilitate deiecit, quasi foret ancillarum vltima. Vidua nunquam cum viro comedit. Mollia, etiam in grauissimâ febre, lectuli strata non habuit: sed super durissimam humum stratis ciliciosis quiescebat: si tamen illa quies dicenda est, quæ iugibus penè orationibus dies noctesque iungebat. Crederes in eâ fontes lacrymarum. Monita vt parceret oculis, aiebat. Turpanda est facies, quam contra Dei præceptum purpurisso, & cerussâ, & stibio sæpè depinxi. Affligendum corpus, quod multis vacauit delicijs. Longus risus, perpeti cõpenlandus est fletu. Inter hæc castitate insignis fuit, in quâ etiâ cum secularis esset, omnium Romæ Matronarum exëplum fuit. Si pauperem videbat, sustentabat; si diuitē ad benefaciendum hortabatur. Liberalitas sola excedebat modum. Nullum pauperem vacuum remisit, Patientiâ luorem superabat, humilitate vincebat omnes. Tantâ continentie fuit, vt propè mensuram excederet, & debilitatem corporis nimijs ieiunijs ac labore contraheret. Sacre scripturæ testimonijs, quasi armaturâ Dei, tentationibus resistebat. His alijsque multis virtutibus prædita, & longo coronata martyrio, cum sentiret adesse mortem, crucis signum pingebat in labijs identidem iterans; Domine, dilexi decorem domus tuæ, & locum habitationis gloriæ tuæ. atque ita obdormiuit in Domino.

Psal. 25.



12. *S. Paula Romana.*

S. EVSTOCHIVM VIRGO.

xxviii. Sep.

Ex Diuo
Hieronym.

EVSTOCHIVM Paula filia, virginitatis & Ecclesie pretiosum monile, Romæ nata est, & in cubiculo sanctæ fœminæ Marcellæ, virginū moribus eruditur. Inde in Himettij patrui sui, commigravit domum. Cuius vxor Prætextata, nobilissima fœmina, habitum eius cultumque mutavit, & neglectum crimem mundano more texuit, vincere cupiens & virginis propositum & matris desiderium: & ecce tibi eadem nocte cernit in somnis venisse ad se Angelum terribili voce minitantem pœnas, & hæc verba frangentem: Tune ausa es viri imperium præferre Christo? Tu caput Virginis Dei, tuis sacrilegis attrectare manibus, quæ iam nunc arescent, ut sentias excruciatam quid feceris: & finito mense quinto ad inferna duceris. Sin autem perseveraveris in scelere, & marito simul orbaberis & filijs. Omnia per ordinem expleta sunt; & seram miseræ pœnitentiam velox signavit interitus. Sic vlciscitur Christus violator es templi sui, sic gemmas & pretiosissima ornamenta defendit; ita sibi EVSTOCHIVM reivindicavit, quæ Deum elegerat & quam ipse Deus præelegerat, ut in specu Saluatoris sui intraret, & in sacro virginis Mariæ habitaret diversorio. Iam Romæ præferebat Bethlehem, & auro tecta fulgentia, informis luti vilitate mutare cogitabat. Cum matre igitur Româ soluit, & Palestinam ingressa est. Hic quâto studio, quibus lachrymis loca sacra visitavit, testis est ipse Dominus, quem adorabat & in membris suis honorabat. Cū matre Paulâ in Bethlehem mansura perpetuò, exiguo per triennium mansi hospitio, sit matri individua, ut nunquā absque eâ cubaret, nunquam proderet, nunquam cibum caperet, ne unū quidem nummū haberet potestatis suæ, sed & paternam & maternā substantiam à matre distribu pauperibus letaretur, & pietatem in parentē, hereditatem maximā & divitias crederet. Orbata Matre, cū sacris alijs virginibus sanctum quod suscepit propositū, & vitæ institutum quod arripuit, maioribus in dies virtutum incrementis adauxit, ac tandem feliciter consummauit.



Sancta Eustochium.

13.

S. MARCELLA VIDVA.

Ex Divo
Hieronym.

MARCELLA orba patris morte, viro quoque post nuptias septimo mense priuata est. Cumque à Cereale Consule ambiciosius expeteretur, qui iam longæuus omnes suas in eam valebat transfundere diuitias, respondit. Si vellem nubere, & nō æterna me cuperem pudicitie dedicare, utique maritum quærerem, non hereditatem. Prima igitur Romæ Christianam coluit viduitatem, quam & conscientia & habitu promittebat. Usæ est vestibus, quibus arceret frigus, non membra nudaret: aurum vsque ad annuli signaculum repudiens, & magis in ventribus egenorum, quàm in marsupijs recondens. Nusquam sine matre. Sine arbitris ne clericis quidem & monachis loquebatur. Semper in comitatu suo virgines ac viduas, & ipsas graues feminas, habuit. Diuinarum scripturarum ardore flagrabat incredibili. Illi erant moderata ieiunia, carnum abstinentia, vini odor magis quàm gustus, propter stomachum & frequentes infirmitates. Rarò procedebat ad publicum, & maximè nobiliū matronarum vitabat domos, ne cogeretur videre quod contempserat: Apostolorū & Martyrū basilicas secretis celebrabat orationibus: matri in omnibus fuit obediens, Nulla eo tempore nobilium seminarum nouerat Romæ propositum monachorum, nec audebat propter rei nouitatem, ignominiosum (ut tunc putabatur) & vile in populis nomē asumere. Hæc tamen non erubuit profiteri, quod Christo placere cognouerat. Hanc multos post annos imitata est Sophronia & alia. Huius amicitijs fruita est Paula venerabilis, in huius cubiculo nutrita Eustochium, virginitatis decus: ut facilis æstimatio sit qualis magistra, ubi tales discipule. Suburbanus ager pro monasterio fuit, & rus electum pro solitudine, multoque ita vixit tempore, ut ex imitatione sui & conuersatione multarum Roma fieret Ierosolyma. Non multò post Romā à Gothis captā, MARCELLÆ quoque domum cruentus victor ingreditur, qui casam fustibus & flagellis ad Apostoli Pauli basilicam deduxit. Post aliquot dies sano, integro, vegetoque corpusculo q̄o dormuit in Domino.

S. MELANIA SENIOR VIDVA.



14.

Sancta Marcella.

L

S. MELANIA SENIOR VIDVA.

Ex Hieron.
& Palladio.

Beatissima MELANIA Romana, consularis Marcellini filia, calente adhuc mariti corpusculo, & necdum humato, duos simul perdidit filios. Nec lacrymæ tamen gutta fluxit. Stetit immobilis, & ad pedes aduoluta Christi: Expeditiùs, inquit, tibi seruitura sum, Domine, quia tanto me onere liberaasti. Itaque cum esset vidua agens annū vigesimū, diuino amore digna, sponso qui in calis est mēte copulari meruit. Hæc, ut filio suo unico tutor nominatus fuit, collectis rebus suis nauigauit Alexandriam. Inde, cum omnia vendidisset & in aurum minutum rede-gisset, Nitriæ attigit montem, atque ibidem per sex menses commorata, omnes qui illic erant sanctos vidit & inuisit. Monasterio Ierosolymis ædificato, viginti septem annis in eodem virginibus convixit. Quantum opum illa dispersit amore Dei, testis est totus orbis. Triginta enim & septem annis hospites excepit, sicque iugiter in suscipiendo ac omnes fouendo permansit, ut ne vnus quidem in solo palmæ spatium voluerit possidere. Cum de neptis statu audisset, quod vellet seculo renuntiare, a-vnus sexaginta annos nata, Casareā nauigans viginti dierum spatio Romam venit, atque illic Pinianum neptis maritum, catechesi instituit, persuasitque perpetuam cum vxore continentiam seruare: quorum exemplo multi conuenere, qui distractis omnibus suis seculo nuntium remisere. Contra omnes autem alios Romani nominis viros atque matronas, ceu contra feras, dimicabat. Prohibebant eam à cate-ris omnibus, ne fortè aliquos ad honestum & tranquillum vitæ portum vi doctrinæ suæ conuerteret. Et hos omnes secularibus laqueis expeditos ad vitam solitariam deduxit: filium quoque admodum iu-uenem consilio docuit, ut vòlebat; & ad Siciliam perueniens omnibus rebus suis ibi distractis Ierosolymam repetiit. Vbi suis opibus ex pro-priâ voluntate diuisis, intra quadraginta dies, optima ac mansuetissi-ma seminarum, beato fine requieuit.



is. *Melania Senior.*

S. MELANIA IUNIOR VIDVA.

xxxi. Dec.

Ex Palladij
Laufiacâ.

MELANIA etate iuuenis, pietatis autem sententiâ vetula, cum à parentibus inuita nubere cogeretur Piniano, viro vrbis Romæ primario, tam iugibus auie sue doctrinis stimulata est, tantumque fuit sauciata, ut matrimonio non posset inservire. Cum autem ei nati essent duo filij masculi, ijque decessissent, tantum eam cepit odium matrimonij, ut quibus posset modis viro continentiam persuaderet. Si volueris, inquit, mecum habitare, ut ratio dictat temperantiæ, & te dominum agnosco, & profiteor meam vitam esse in tuâ potestate. Tantum permitte, ut satisfaciam meo, quod est ex Deo, desiderio, facta heres eius, quæ est ex Deo, virtutis mee auie, cuius etiam nomen gero. Si enim vellet nos Deus degere in hoc mundo, & frui rebus mundanis, non filios mihi natos accepisset immaturos. Ad postremum Deus misertus adolescentis, misit in cor eius continenter vivere, & omnia quæ mundi sunt, arbitrari ut stercorea. Vigesimo ergo etatis sue anno MELANIA mundo renuntiat: & primum quidem omnia sua serica vertit in ornatum ecclesiæ; argentum autem & aurum Sanctis viris in Oriente distribuit. ecclesijs autem Occidentis, monasterijs, Xenodochijs & omnibus egentibus per seipsum in hilaritate ministrabat necessaria. Ita enim singulis suam pecuniam diuidebat, ut singulis necessarium erat, non ad luxuriam, sed ad necessitatem. Nemo ab eâ pauperum vacuus reuersus est. Seruos verò promiscui sexus, quicunque manumitti volebant, usque ad octo milia liberos fecit. Huiusmodi autem erat eius exercitatio: Post alterum diem consuevit cibum sumere; nam inter ipsa principia quinto quoque gustabat die: cum ancillis suis diurnas ministerij vices obibat, quas in monasterio ut sorores habuit. Cognatos ad religiosam traxit vitam, ut cum ipsâ religiosè Deum colerent.

BATA CANDIDA, Trinitatis duci uxore, magistra Christi no-
mina & cultus egregia, castitate laudabilis, caris Dei do-

Ex Palladij
Lambach



16. S. Melania Junior.

SS. CANDIDA ET GELASIA.

Ex Palladij
Lausiaca.

BEATA CANDIDA, Traiani ducis vxor, magna Christi nominis & cultrix egregia, castitate laudabilis, varijs Dei donum ijsque pretiosis decorabat ornamentis. Episcopos & omnem Christi clerum tanquam verbi Dei pracones, & Sacramentorum ministros pro dignitate venerabatur. Cum filiam suam instituisset in sorte virginitatis, eam premisit ad Christum, donum suorum ilium; postea autem ipsa quoque temperantia, & castitate, & pecuniae dispersionibus filiam suam est insecuta. Interrogata, cur tota nocte laboraret, & moleret, & oblationis panem manibus suis ipsa formaret; ad vires, inquit, corporis deprimendas: cum enim non sufficit ieiunium, hanc ei do sociam laboriosam vigiliam, vt Esau dissoluam, eneruemque lasciuiam. Haec ipsa ab omni carne semper abstinuit, pisces tamen & olera cum oleo festis tantum diebus sumere consueuerat. Per reliquum aui sui tempus oxycrato & sicco pane contenta viuebat. In hac vitae asperitate cum beatam requie obdormisset haec mulier inclita, nunc fruitur bonis aeternis quae parata sunt ijs qui diligunt veritatem & faciunt iustitiam, & operibus bonis insudant.

Fructum quoque suae exercitationis reliquit venerandam GELASIAM, quae zelo huius bonae feminae, veritatis viam ingressa est, pie trahens iugum virginitatis. Huius optima haec fertur virtus, quod sol nunquam occidit super eius iracundiam, non aduersus seruum, non aduersus ancillam, non aduersus aliquem alium. Haec beata cum effugisset viam eorum, qui sunt acceptae iniuriae memores, quae fert ad mortem aeternam, euasit hunc malum diaboli stimulum: & cum desideraret aeternam peccatorum remissionem, remisit parua delicta, vt ipsa quoque inueniret maiorum remissionem.



SS. Candida et Gelasia.

S. SYNCLETICA.

Ex Vitis
Patrum.

SYNCLETICA miræ sanctitatis femina fuit, quam velut perfectissimæ vitæ formam S. Athanasius femineo sexui solebat præscribere, sicut Antonij vitam viris pro normâ viuendi proposuerat. Sed quia SYNCLETICÆ vitæ bodie non superest, referemus hic aliquot eius scitè dicta ex Vitis Patrum. Eos quibus in vitâ spirituali impedimenta à diabolo obijciebantur, hac similitudine animare solebat; Qui nauigare cœperint, primò pandentes vela prosperum ventum inueniunt, postea autem contrarius eis ventus occurrit. Sed nautæ non mox propter incursum contrarij venti, aut exonerant, aut deserunt nauim; sed paululum sustinentes aut pugnantes aduersus procellâ, iterum rectum cursum inueiunt: Ita ergo & nos in contrarium spiritum incurrentes, crucem pro velo erigamus, & sine periculo sæculi istius nauigium explicabimus. Interrogata, si perfectum bonum est, nihil habere, dixit: Sicut fortia vestimenta dum calcantur, & pedibus sæpiùs reuerfantur, lauantur atque incandiduntur; ita fortis anima per voluntariam paupertatem amplius confirmatur. Solebat dicere ijs, qui ex impiâ vitâ ad sanctiorem se conferebant: Magnus labor est impiorum, qui conuertuntur ad Deum, & postea inenarrabile gaudium. Sicut enim qui ignem accendere volunt, priùs fumantur, & ex fumi molestiâ lacrymantur, sicque obtinent quod volunt (Etenim scriptum est: Deus noster ignis consumens est;) Ita oportet & nos diuinum ignem cum lachrymis atque laboribus in nobis ipsis accendere. Contra malas cogitationes hoc remedium suggerebat: Sicut venenosa animalia acriora medicamenta à se expellunt; ita cogitationem sordidam ieiunium cum oratione depellit ab animâ.




is. Sancta Syncretica.

S. OLYMPIAS VIRGO ET VIDVA.

xvii. Dec.

Ex Palladij
Lauſiacâ.

OLYMPIAS, pretioſum vas ſancti Spiritus, Anyſij Secundi Comitſ filia, neptis Ablauij præſecti, Nebridij ſponſa, cui cùm parentibus orbata in matrimonium tradita eſſet, cum eo viginti menſibus in continentia vixit: eo mortuo ad ſecundas nuptias non tranſijt, ſed virgo ſimul & vidua remanſit, omne tempus tranſigens in ieiunijs, orationibus, & pauperum beneficiâ. Itaque omnes opes ſuas in curam Chriſti Sacerdotum exauſit, præſertim in Sanctum Ioannem Chryſoſtomum, quem præcipue honorabat. Non vrbs, non rus, non ſolitudo manſit expers largitionum huius inclytæ virginis, ſed & eccleſijs ſuppeditauit ad donaria deputata ſacrificio, & monaſterijs, & cœnobijs, & Xenotrophijs, cuſtodijs, & relegatis, & (ut ſemel dicam) in omen orbis terræ diſperſit eleemoſynas. Humilitate ſuperabat omnes: vita illi ſine ullâ inani gloriâ, ſpecies nequaquam ficta, benigni mores, facies non ſucata, corpus florens, mens non glorioſa, animus ab arrogantia alienus, ſomni expers vigilia, charitas immenſa, infinita continentia, in Deum ſpes æterna. Veſtimentis eius nihil vilius inueniri potuit, cùm pannofis etiam indigna eſſent huius ſanctæ tegumenta. Tanta autem erat eius manſuetudo, vt etiam puerorum longè ſuperaret ſimplicitatem: vidiffes fonti potiùs æſtate ſua deficere fluentia, quàm huius tam ſublimibus & Chriſtum ſemper intuentibus oculis lacrymas deficere. Hæc ergo non amplius quæ mundi, quæ carnis erant, ſed quæ Dei ſunt, recogitans, pro Chriſti nomine contumeliam pati digna fuit, & ſic ad Confeſſorum gloriam, pro veritate quam coluit, meruit peruenire. Nam talis in hoc mundo finis quoque vitæ fuit. Omnibus ad poſtremum ſe periculis oppoſuit, & in his mortua beatam accepit gloriam, & in infinito ſæculo coronata pompam agit, nulli interitui obnoxias cum ſanctis in æternum manſiones habitans, & bonorum operum à Chriſto Domino cùm fiducia accipiens remunerationem.



ig. *Sancta Olympias.*

M 2

S. ALEXANDRA VIRGO.

Ex Palladij
Laufiacâ.

Ancilla Christi ALEXANDRA, cum propter eximiam formæ pulchritudinem adolescens quidam, insano captus amore, eam deperiret, & illa constanter humanas nuptias recusaret, ut Christo multo suavius adherere posset; maluit se viuam includere monumento, quam adolescentis animam offendere, quæ ad imaginem Dei facta esset. Itaque relictâ ciuitate monumento se inclusit, & per foramen accepit, quæ corpori necessaria erant. Rogata, quomodo ferre posset cum nullo omnino colloqui, sed sola pugnare cum desidiâ & cogitationibus, respondit: Amane usque ad horam non amoro, per horam lini fila duco, reliquis autem horis mente reuoluo vitam Sanctorum Patrum & Patriarcharum, & certamina beatorum Apostolorum, & Prophetarum & Martyrum, & adeorum imitationem cælestisque gloriæ palmam exardeſco. Postquam autem aduentarit vespere, cum Dominum meum glorificauero, cibum capio, plurimas horas noctis perseuerans in oratione. Tandem anno duodecimo, ex quo sepulchro inclusa fuerat, neque in virorum, neque in mulierum conspectum venerat, cum sub graui corporis labore die noctuque desudasset, totoque mentis desiderio ad cælestem patriam properaret, cuperetque dissolui & apparere ante faciem Christi Dei, cum admirando sanctitatis iudicio ad Dominum leta migravit, seipsam componens. Nam cum virgo, quæ eius curam gerebat, ei quæ necessaria subministrabat, ad eam accessisset, & illa non responderet, monumenti ostium amouit, & inuenit eam obdormisse. Inuisit aliquando ALEXANDRAM Melania Romana senior, sed (ut ipsa referebat) beatæ faciei intueri non potuit; sed stans circa foramen, omnem vitæ eius rationem didicit, uti iam descripsimus.



20. *Sancta Alexandra.*

S. MAGNA VIRGO ET VIDVA.

Ex Palladij
Laufiacâ.

FVERVNT in ciuitate Ancyra multæ quidē aliæ virgines, nempe ad decem millia, duo autem vel plura, quæ exercebantur & omni virutis institutione militabant; omnesque temperantiæ legibus claræ & insignes feminae, diuinum certamen studio exquentes. Inter quas principatum obtinebat in pietate MAGNA, honestissima femina & probissima: quam nescio quid sim nominaturus, virginemue, an viduam; à matre enim vi viro coniuncta; eum tamen variis inescans dilationibus, & corporis morbos prætexens, à corruptionis vitio integra & intacta permansit: Cumque paulò post decessisset eius maritus, omnium simul facta est heres vnica: & temporalibus deinceps commutans æterna, totam seipsam Deo obtulit, summè curam gerens vitæ quæ semper manet, suis famulis honestè imperans, agens vitam laboriosissimam & plenam temperantiâ: sub proposito ac vitâ monachorum, honestam propriæ domus curam gerens. Cuius, quoties hoc ratio vel necessitatis postulasset causa, castus apud omnes & sermo & conspectus erat. In congressu tam seuera, vt ipsum eius aspectum reuererentur etiam excellentissimi Episcopi propter insignem pietatem & religionem. Atque ipsa quidem super uacaneam & nimiam opum materiam, possessionum vacuitatis igne consumpsit: quæ autem super erant, ea constituit ad subministrationem monasterijs, ptochotrophijs, xenodochijs, ecclesijs, pauperibus, transeuntibus, Episcopis, orphanis, viduis, & omnibus egentibus suppeditans auxilium, non cessabat hilariter operari pietatem latenter & per se & per seruos fidelissimos, ab ecclesia nō recedens, noctu maximè: in omnibus in virtute se exercens, propter spem eius, quæ verè est vita.



21. Sancta Magna.

Ex Theod.
Philotheo.

DIVINI Maronis vitam emulata DOMNINA admirabilis, in horto maternæ domus paruum quoddam fixerat tuguriū. Ei autem tugurium efficiebat panici stipula. Continuis lacrymis non solum rigabat genas, sed etiam vestimenta ex pilis: talibus enim indumentis tegebat corpus. Circa gallorum cantum ad diuinum templum, quod nō erat procul, vadens cum aliis & feminis & viris, vniuersorum Domino laudes offerebat. Hoc autem faciebat non solum die incipiente, sed etiam desinente, quouis alio locum Deo consecratū magis esse venerandum censens. Eā de causā & eius magnam curam habuit, & matri fratribusque persuasit, vt facultates suas ad decorem domus Dei consumerent. Lens madesacta nutrimentū ei erat, & omnē hunc laborem sustinuit, cum esset planē exsiccato corpore & semimortuo. Pellis subtilissima, & quæ erat instar membranæ, ossibus vix hærentibus circumiecta erat. Proponebatur omnibus eam videre volentibus: sed neque vultus aspexit, neque aliis vultum suum videndum exhibuit; nempe quæ amictu penitus contecta & usque ad genua incuruata erat. Voce gracili & non expressā satis loquebatur, sed nunquam sine lacrymis. Vehemens enim amor in Deum illas parit lacrymas, pungit aculeis & vrget ad eum, qui est hinc futurus, excessum. Cum quodam tempore eam Theodoretus Episcopus inuideret, sumebat eius manum dexteram, & oculis imponebat: quam adeo madesactam dimittebat, vt ex ipsā manu distillarent lacrymæ. Porro quamuis in his diu noctuque versaretur, non ideo contempsit alios virtutum actus, sed pro viribus curabat Athletas Christi, monachis necessaria suppeditabat, vt eorum precibus obtineret æterna. Ita non suis tantum orationibus celum penetrabat, sed scalas quoque erexit ex suis facultatibus, quò expeditior ad celum pateret aditus.



22. Sancta Domnina.

N

SS. MARANA ET CYRA.

Ex Theod.
Philotheo.

FVIT his patria Berboea, patriæ genus insigne, educatio generi conueniens. Sed his omnibus contemptis, cum exiguum quendam locum ante urbem comprehendissent, & intrassent, luto & lapidibus ostium obstruxere. Famulas autem, quæ eiusdem vitæ volebant esse participes, exstructo extra ambitum habitaculo, iusserunt in illo habitare: ipsæ verò cum neque domum nec tugurium haberent, sub duo suâ sponte vitam agunt. Pro ianuâ erat eis parua quadam fenestra, per quam alimenta susciperent, & cum ijs quæ veniebant colloquerentur mulieribus. Huic sacra consabulationi tempus definitum erat Pentecostes, alio autem tempore vitam amplectebantur quietam. Ferrum gestabant & tantum onus, ut CYRA, cui corpus erat imbecillius, ad terram usque incuruaretur, & corpus minimè posset erigere. Habebant autem vela maxima, ut retrò ad terram fluere & pedes contegerent, anteriùs autem usque ad ipsam zonam dmitterentur, vultum simul & collum, & manus penitus occultantia. Hoc modo autem vixere, non quinque solum vel decem solis transactis annis, sed quadraginta duobus. Et cum tanto tempore decertassent, tanquam quæ nuper certare cœpissent, sudoribus gaudebāt: eā de causa iniurias aëris patienter excipiunt. Diuini Moysis æmulatæ ieiunium, ter tanto tempore in ediam sustinuerunt: ter quoque Danielis à cibo abstinentiam secutæ, tres dierum hebdomadas abstinebant. Ierosolymam profectæ nihil cibi in viâ sumunt: sed adorato Domino refectæ sunt; rursus à ieiuniis confectum est iter, & reuersæ sunt. Peregrinantes ad S. Teclam, ibant & redibant ieiuna. Atque eæ quidem quæ tali vitæ instituto femineum genus exornauere, ut quæ alijs fuerint exemplaria, modò coronantur à Domino,



23. SS. Marana et Cyra.

Ex Palladij
Lausiaca.

BEATA SYLVIA Virgo, soror fuit Ruffini ex praefecti. Hæc cum nauigaret ab Æliâ in Ægyptum, habebat in comitatu suo Iubinum diaconum, virum pium & eruditum. Cum autem vehementissimus eos æstus inuasisset, & pervenissent Pelusium, accidit ut Iubinus acceptâ pelui, pedes & manus lauaret aquâ frigidissimâ, & postquam lauisset, super pelliculam humi stratam requiesceret. Cum autem illa aduertisset, ut mater sapiens, germani filij eius increpauit mollitiem, dicens: Quis in animum inducis, illam agens ætatem, viuente adhuc tuo sanguine, usque adeo tuam fouere carunculam, non sentiens damna, quæ ex eâ oriuntur? Confide, confide: ecce ego agens annum ætatis sexagesimum, præter extrema manuum mearum, nihil vnquam laui; non pes meus aquam tetigit, non vultus, neque vllum ex membris meis, etiamsi me variæ inuaserint egritudines. & cum à medicis cogere vti balneo, non induxi in animum carni reddere debitum, non in lecto quiescens, non lecticâ vsquam gestata ingrediens. Hæc cum esset doctissima, doctrinam amore complexa, noctes mutabat in diem, omnia antiquorum qui commentarios ediderunt, scripta percurrrens, Gregorij, & Stephanij, & Pierij, & Basilij, & quorundam aliorum præstantis virtutis virorum, vigin-tiquinque myriadum: non leuiter nec temere hæc percurrrens, sed elaboratè, septies vel octies, vnumquemque librum perlegens, ut horum verborum gratiâ, in altum erigeretur, spe bonâ seipsam, auem efficiens spiritualem, & ad Christum euolans, immortales ab ipso acceptura renumerationes.



24.

Sancta Syluia.

S. SARA VIRGO.

Ex Vitis
Patrum.


ABBATISSA beatæ memoriæ Virgo SARA, vitam eremiticam transēgit in Ægypto, temporibus Imperatoris Theodosij senioris, in vastissimâ Scetes eremo, vbi Deo Angelisque nota, sæculo ignota vixit. Unde pauca de eius vitâ perscripta sunt. Quod de eâ sequitur, Vitæ Patrum nobis exhibent. Adeò studiosè oculos suos custodisse dicitur, vt supra aluenm fluminis sexaginta annis habitauerit, & nunquã inclinata sit vt flumen ipsum aspiceret. Cùm tredecim annis ab impugnationibus demonum fortiter impugnaretur, nunquam orauit vt recederet à se huiusmodi pugna, sed solum hoc dicebat: Domine, da mihi fortitudinem. Cùm aliquando ei infestior esset, imminens fortius, idem fornicationis demon, mittens in cogitationem eius sæculi vanitates; illa non relaxans animam à timore Dei & à proposito abstinentiæ suæ, ascendit super lectulum suum orare: & apparuit ei corporaliter spiritus fornicationis, & dixit ei: Tu me viciisti, SARA. Illa autem respondit: Ego non te vici, sed Dominus meus Iesus Christus. Venerunt aliquando duo senes de partibus Pelusij ad Abbatissam SARAM. Et cùm ambularent, dicebant ad inuicem: Humiliemus vetulam istam. Et dicunt ei: Vide, ne extollatur animus tuus, & dicas: Quia ecce solitarij viri veniunt ad me, quæ mulier sum. Et dixit eis Abbatissa SARA: Sexu quidem mulier sum, sed non animo. Iterum dixit Abbatissa SARA: Si poposcero à Deo, vt omnes homines adificentur in me, iuuenior ante ianuas singulorum pœnitentiam agens: sed magis oro, vt cor meum cum omnibus purum sit.







25.

Sancta Sara.







(3)

12/9

-151/-